

le III

A
A

R. BIBL. NAZ.
Vitt. Emanuele III.

RACCOLTA
VILLAROSA



174

NAPOLI

Race. Villars & A. 17²/₄

13/1/13

Journal of J. J. J.

527180

LOGICAE

A C

METAPHYSICAE

EPITOME

AD USUM TIROMUM.



NEAPOLI MDCCLXXVII.

EX OFFICINA VINCENTII URSINI.

Superiorum facultate.




LECTORI BENEVOLO

EDITOR.



Etus est doctorum Virorum querela, viam ad Scientias compendiarium passim muniri, & duarum vel trium plagularum libellis adolescentes ad universam eruditionem informari. Contra sunt, qui contendunt, artes paucissimis praeceptis tradendas esse, nec perplexis ac longis ambagibus scientias involvendas: exercitationi ac meditationi aliquid, imo plurimum dari oportere. Quid in hac sententiarum dissensione? Illud profecto optimum factu, si vitaveris Horatianum illud, *Nil medium est*. Ita siquidem fiet, ut nec longo atque inutili sermone languidi discedant auditores, neque ex nimia brevitate implicati haereant. At enim: contra Horatianum praeceptum peccatur in hac, quae modo datur, Logicae ac Metaphysicae Epitome. Ajo enimvero. Sed cum suis res finibus honestentur; nemo id quidem mihi vitio vertet, si ad propositum finem oculos con-

conjiat. Quid enim? Hujusmodi compendium eo consilio tironibus exhibetur, ut ea, quae fufius pertractata in Institutionibus ad ufum Seminarii Neapolitani jam editis didicerunt, heic fumatim defcripta, atque in certos veluti ordines digeffa in animo figant, retineantque. Neque enim quidquam proficiet, qui una hac Epitome contentus Philofophiae penetralia adire tentaverit. Memoriae igitur juvandae duntaxat illa deftinatur: cui fane confilio fi tironum labor atque industria apte refpondeat, eorum utilitati fatis feciffe mihi gratulabor.



LOGICAE ELEMENTA.



Logica duplex vulgo distinguitur, *naturalis* una, *artificialis* altera, five *adquisita*. Illa est vis & sagacitas, quam a natura accepimus, ut veritatem investigemus. Haec vero ars est, quae certis quibusdam praeceptis hominis rationem regit ac iuvat in veri indagatione. Eam autem, uti ceteras artes, Natura quidem inchoavit, industria vero perfecit.

Plurimum vero naturae ab arte accedit. Nam 1. doctrinae studium explicat, atque evoluta aperit ea tamquam semina, quae natura nobis indidit. 2. Sola duce natura veritatem per labores ac tentamina adsequimur; at citius & facilius artis praeceptis. 3. Artis ope liberamur ab erroribus ac praeiudiciis, quae investigandae veritatis iter intercipiunt.

Eo igitur huiusce artis praecepta respiciunt, ut homo recte cogitare, suisque cogitationibus

A

ve-

verum adsequi possit. Eam propterea *Artem cogitandi* definire licet.

Intellectus porro cum cogitat, aut *percipit*, aut *judicat*, aut *ratiocinatur*, aut tandem suas cogitationes *disponit*. Quae quidem vulgo appellantur intellectus *operationes*.

Perceptio sive *simplex apprehensio* dicitur intellectus cogitatio, qua rem percipit duntaxat, nihilque de illa ait aut negat. Veluti cum *lineam*, *angulum* percipio.

Haec autem perceptio multiplex est. 1. *Intellectio pura* dicitur ea cogitatio, qua rem percipimus nulla corporea imagine expressam.

2. *Imaginatio* est cogitatio, qua res ita concipitur, ut sensibilis illius imago intra nos efformetur.

3. Dicitur etiam *imaginatio*. actus ille, quo absentium rerum imagines iterum animo repraesentamus.

4. *Memoria* vocatur vis illa, qua iterum percipimus, quae olim percepimus, conscii quidem nos ea percepisse. Qua sublata conscientia nulla est memoria.

5. *Sensatio* duplex est, *interna*, atque *externa*. Illa est vis, qua Mens sese, & quidquid intus agit aut patitur persentiscit. Haec vero est perceptio rerum externarum, quae sensus corporis afficiunt.

In sensatione externa duo sunt distinguenda, motio in sensuum organum excita, & Mentis attentio. Alterum pendet a rebus objectis, quae extrinsecus sensibus occurrunt. Alterum ad Mentem attinet, quae nisi attendat, res externas in sensus offendentes percipere nequit.

Al-

Altera intellectus operatio est *Judicium*. Est autem *judicium* Mentis actio, qua duarum rerum convenientiam aut dissensionem percipit. Itaque duplex est, *adfirmans*, aut *negans*: nimirum ajo *virtutem esse laudabilem*; nego *avarum esse beatum*.

Tertia intellectus operatio est *Ratiocinatio*, sive *discursus*: ille scilicet actus, quo duo judicia simul componimus, & ex iis tertium colligimus. Ex. gr. Vera virtus ad Deum referenda est; suas autem virtutes ad Deum non retulerunt Gentiles; vera igitur virtus non erat.

Methodus tandem dicitur certus quidam ordo, quo perceptiones, judicia, ac ratiocinationes disponuntur ad veritatem aliquam detegendam.

LOGICAE PARS I.

CAPUT I.

De Ideis.

CUm aliquid percipimus, illius quamdam notionem nobis ipsi animo repraesentamus: notio isthaec dicitur *idea*. Est itaque idea id, quod praefens est nostrae Menti, cum aliquid percipit, *forma* nimirum, *species*, *exemplar* rei objectae.

Idea porro distinguenda est a *visione* sive *phantasmate*; Ex. gr. imago illa, quae mihi, dum *florem* cogito, *florem* exhibet, non est *idea*, sed *visum* aut *visio*. *Purae* igitur *perceptionis* actus est *idea*, *visio* vero *imaginationis*.

Ideae, inspecta earum origine, sunt *adventitiae*, *factitiae*, & *innatae*. *Adventitiae* sive *adquisitae* sunt quae per sensus nobis adveniunt. Huiusmodi sunt ideae rerum omnium corporearum.

Factitiae, quas ex adventitiis componendo vel separando, vel alio quovis pacto nos ipsi effingimus. Veluti *idea centauri*, *superficies* &c.

Innatae a quibusdam dicuntur illae, quas in animo consignatas a prima nostri origine habemus.

Quod si Idearum affectiones inspiciamus. I.
Ideae

Ideae aut sunt *clarae*, aut *obscurae*. Clara quidem est idea, si rei objectae peculiares proprietates exhibet. Obscura vero, si communes duntaxat cum aliis proprietates praefert. Nimirum rei alicujus claram ideam habeo, si propria illius attributa cognosco; quod si communes & vagas proprietates perspectas habeam, obscura illius rei mihi obversabitur idea. Ex.gr. valde obscura est idea *quadrati*, si illud ut *figuram planam quadrilateram* concipio; haec enim proprietas tum quadrato, tum ceteris parallelogrammis ac trapeziis communis est. Ea erit minus obscura, si quadratum ut *quadrilaterum parallelogrammum* mihi exhibeam; id enim convenit quadrato aequae ac ceteris parallelogrammis. Quod si quadratum concipio ut *figuram quadrilateram aequilateram & rectangulam*, clara erit illius idea.

II. Ideae sunt vel *distinctae*, vel *confusae*. Confusa porro esse potest idea tribus de causis. 1. Si rei objectae proprietates non apte internoscantur; quod quidem oritur ex praecipiti mentis perceptione, quae uno obtuta rem considerat. Veluti si non apte secerno proprietatem, qua latera aequalia quadratum habet, ab ea, qua angulos rectos habet.

2. Si proprietates oppositas, aut ad aliam rem pertinentes in idea alicujus rei simul admisceo. Veluti si quis humanam Mentem concipiat ut materiam subtilissimam, quae in homine cogitat.

3. Si rei objectae proprietates cum meis affectionibus permisceo. Veluti cum calorem

illum, quem manu ad ignem admota sentio in igne esse existimo.

Si triplex hoc vitium abest, ideae sunt distinctae. Nimirum si rei proprietates apte fecernantur, si repugnantes proprietates non admisceantur, si cum rei proprietatibus nostrae affectiones non confundantur.

III. Idea vel est *completa*, vel *incompleta*. Completa quidem est, si per eam res ab omnibus aliis semper fecernitur; hujusmodi est idea quadrati, ut figurae quadrilaterae aequilaterae & rectangulae. Incompleta vero, cum ope illius res ab aliis non distinguitur; cujusmodi est idea, qua quadratum ut figura quadrilatera concipitur. Hinc patet ideam completam reciprocari cum clara; incompletam vero cum obscura.

IV. Idea dicitur *adaequata*, si omnes omnino rei proprietates perspectas habeo; secus vero, *inadaequata*. Hinc patet non oportere adaequatam esse ideam, ut sit clara. Nam clara proprias tantum, adaequata vero omnes ad unam rei proprietates complecti debet.

V. Idea vel est *simplex*, vel *composita*. Simplex dicitur illa, in qua ne per conceptum quidem Mentis plura licet distinguere. Hujusmodi sunt ideae sensationum, actuum, & affectionum nostrae Mentis. Incassum enim nitimur, si partes ullas distinguere velimus in sensu odoris rosae, in actu voluntatis &c. Composita vero, in qua plura seorsum intelligere possum. Hujusmodi sunt ideae omnium corporum, civitatis, exercitus, virtutum, vitiorum.

VI. *Ideae in veras, aut falsas* vulgo distinguuntur. *Ideae* porro vel ad id, quod interius in *Mente* est, sive ad se ipsas, vel ad aliquod exterius ab ipsis distinctum referuntur. Si ad se ipsas referantur, nullus in ideis falsitatis locus esse potest. Nam *idea* est rei forma animo comprehensa; fieri igitur nequit, ut *Menti* non obversetur, quod illi reapse obversatur.

At si ad aliquid exterius referantur, falsitatem admittere possunt *ideae*. Quae quidem falsitas ex falso *Mentis* iudicio proficiscitur. Huiusmodi falsa est *idea centauri*, si *Mens* quoddam animal reapse existere putet, cui illa respondeat.

VII. *Ideae in singulares, particulares, atque universales* dividuntur. Singularis est, quae rem certam, determinatam exprimit: ut *idea Platonis*. Particularis, quae rem unam, sed indefinitam exhibet: ut *idea cujusdam hominis*. Universalis, quae pluribus rebus communis est, ut *idea humanitatis*.

Huiusmodi autem universales *ideae* ope *abstractionis* efformantur. Est enim abstractio *Mentis* actus quo omissis iis, quae singularum rerum propria sunt, ad illud attendit, quod iis commune est: Differt autem abstractio a *praecisione*. Huius enim opera alicujus rei proprietates alias ab aliis seorsum consideramus.

VIII. Jam vero communes sive universales *ideae* ad quinque classes revocantur. Vulgo *universalia* sive *praedicabilia* dici consueverunt, quippe *praedicari*, h. e. enunciari possunt de aliquo. Sunt autem

1. Genus est *idea attributi, quod sui similis*

communione quadam, specie autem differentes, duas pluresve complectitur partes. Sic idea substantiae complectitur Spiritum & Corpus. Est autem summum aut medium. Illud nulli subijcitur, ut Ens: hoc autem ita genus est, ut possit esse species: veluti Corpus, quod in animatum, & inanimatum distinguitur, substantiae vero subijcitur.

2. *Species sunt hae, in quas Genus dividitur: veluti sunt Spiritus & Corpus, quae sunt species substantiae.*

3. *Differentia est id, quo species genus excedit: sive quo species a specie differt, individuum ab individuo. Ita quod triangulum tribus comprehendatur lineis, est illius differentia.*

4. *Proprium est attributum, quod necessario ex differentia sequitur. Veluti quod trianguli duo latera utcumque sumta tertium excedant.*

5. *Accidens est attributum, quod sine rei detrimento ab illa abesse potest: ut in cera rotunditas.*

IX. *Ideae ratione eorum, quae repraesentant, dividuntur in ideas Substantiarum, & Modorum. Substantia sive res appellatur illud, quod per se constat, suam habet existentiam, seorsum ab aliis existit, in seipso, non in alio tamquam subiecto inhaeret. Modus vero sive proprietas, aut attributum est illud, quod in re, cujus modus est, existit, Substantiae nimirum inhaeret.*

Singularum porro substantiarum ideae constantur ex ideis modorum. Modos enim, quos veluti colligatos simul cohaerere sensibus percipimus, unius substantiae nomine designamus.

Ita

Ita *extensionem*, *divisibilitatem*, *mobilitatem*, *soliditatem* &c. simul conjunctas *Corpus* appellamus. Contra vero modorum ideae ex substantiarum ideis lucem accipiunt. Neque enim modus est, nisi substantia ea *essendi* ratione praedita.

A vero aberrat Lockius, qui substantiam definit ignotum subiectum, quod modis *substat*, h. e. subest: unde colligit singularum rerum ideas nihil aliud praeferre, nisi proprietatum simul existentium collectionem, quibus ignotum subest subiectum. Hoc enim ignotum subiectum, quod ipse fingit, vaga est generis idea, quam non modo singulis substantiis, verum & figuris, numeris, durationi, & ceteris quibuscunque adnectere solemus: Absurdus autem esset, qui communem hujusmodi ideam reapse existere, & ab ipsis peculiaribus rebus distingui arbitraretur. Ita cum triangulum veluti figuram planam tribus comprehensam lineis concipimus; nemo dixerit esse aliquam figuram, quae diversa a spatio tribus lineis definito subest trianguli proprietatibus.

Quamobrem cum peculiare substantias animo complectimur, proprietatum, quae simul sunt, cohaesionem & nexum investigare debemus. Illae enim ita secum cohaerent, ut aliarum ratio in aliis contineatur.

Substantiae porro alicujus *Essentia* dicitur ea proprietas, quae prima concipitur, aliarumque rationes in se comprehendit. Hinc ceterae proprietates in *essentiales* & *accidentales* distinguuntur. Illae si negligantur, res ipsa concipi nequit: his autem licet non attendatur, res ipsa concipitur. X.

X. *Relationis* idea dicitur ea, qua ad aliam contemplandam ducimur. Ita idea *patris* complectitur *filiorum* procreationem. Atque haec relatio rei ipsi innititur, quatenus haec causam affert, quare Mens illam ad aliam referat.

C A P U T II.

De Definitione & Divisione.

Definitio est oratio, quae quid sit id, de quo agitur, ostendit quam brevissime. Duplex est, *nominis* & *rei*: illa vocis potestatem, haec rei naturam aperit. Illa ab hominum arbitrio pendet: haec cum re ipsa conveniat oportet.

Rei definitio vel est *essentialis*, vel *descriptiva*. Prima fit per attributa essentialia, genus nimirum ac differentiam: veluti: *Triangulum est figura plana tribus circumscripta lineis*. Altera vero per proprietates, quae ad essentiam non pertinent: veluti: *Homo est animal bipes, implume, capite erecto &c.*

Definitio oportet 1. ut non sit amplior, neque angustior re definita: 2. ut brevis sit; proximum nimirum genus ac propria differentia adhibeatur: 3. ut sit clarior re definita.

Divisio est totius in partes distributio. Totum autem *Logicum* est aut *Physicum*. Illud partes potestate quadam sibi subiectas habet: ut *animal*, quod dividitur in *hominem* & *belluam*. Hoc vero a partibus reapse componitur: ut *homo*, qui constat *Mente* & *corpore*.

In divisione 1. nulla pars praetermitti, aut redundare debet: 2. pars una aliam non comple-

❖ II ❖

plectatur. 3. gradatim & per membra proxima fiat.

C A P U T III.

De idearum signis, seu de Vocibus.

VOces ea de causa sunt institutae, ut interna animi sensa aliis aperirentur. Sunt igitur idearum signa. Non ita tamen, ut natura ipsa vocibus nexae sint ideae; vocum enim potestas ab hominum pendet arbitrio: at usu quotidiano necestuntur:

Plura tamen sunt vocum genera. Et 1. voces aut sunt *universales*, aut *particulares*, aut *singulares*: prout nimirum magis minusve patent ideae illis destinatae. Recolantur igitur quae dicta sunt cap. I. num. VIII.

2. Vox est vel *synonima*, vel *homonima*, vel *analogia*. *Synonima*, quae Scholis dicitur *univoca*; est quae secundum unam eandemque rationem pluribus tribuitur: ut *homo* eadem notione Caio & Sempronio tribuitur.

Homonima, sive *Latinis ambigua*, Scholis *aequivoca*, est quae plane diversa significat: veluti *aries*, quae vox belluam; machinam bellicam, & signum caeleste significat.

Analogia, sive *translata*, est quae propter proportionem aliquam pluribus accommodatur: veluti cum *capitis* nomen montis, arboris, &c. fastigiis tribuimus.

3. Vox vel est *finita sive positiva*, quae scilicet rem certam significat, ut *homo*, *sapiens*: vel *infinita sive negans*, quae rem aliquam, & rei

rei ipsius absentiam praefert, ut *non homo, insipidus*.

Jam porro vocibus recte utendum est, ut quae loquentis animo obversantur ideae, eadem in auditorum animis verba excitent. Quamobrem sequentes regulae servandae sunt.

1. Voces usurpentur, quibus certa quaedam notio destinatur. Secus enim inanes erunt. Hujusmodi sunt nomina *casus*, *fortunae* apud veteres, & *quasi corporis*, & *quasi sanguinis* apud Epicureos.

2. Obscurae aut confusae ideae verbis non adjungantur. Hoc vitio laborat illa motus apud Scholasticos definitio, *Actus entis in potentia quatenus in potentia*: tum *vacui horror*, *antipathia*, *sympathia* stupidae naturae attributa.

3. A vocibus ambiguis abstinence: nisi earum vis facile dignoscatur, aut explicetur: tum translatae ita adhibeantur, ut ex orationis contextu earum sententia eruatur.

4. Iisdem vocibus eadem semper notiones subjiciantur.

5. Usitatis vocibus novus sensus non affigatur, neque nova inducantur vocabula, nisi alii praemoneantur.

Recentitis regulis alias adjungere praestat, quibus alios probe intelligere possimus. Tria porro in antecessum nobis comperta sint, cum ad alicujus libri lectionem accedimus.

1. Linguam, qua ab auctore ille exaratus est, callere debemus: 2. auctoris mores, & ingenium, consuetudines & religionem civitatis, in qua floruit, in explorato habeamus: 3. aetate-

tatem, qua ille vixit, inquiremus. Quisque enim patriae moribus affinia scribit, & vocabula eo sensu accipit, quo per suam aetatem usurpâri solent.

Deinde 1. quavis de auctore praejudicata opinione vacui librum legendum aggrediamur. 2. verba usitato sensu accipiamus, nisi absurdam exprimant sententiam. 3. In metaphoricis locutionibus ad translatum sensum animum intendamus.

Ut autem metaphoras dignoscamus, quatuor adhibebimus regulas: Prima est: Quod prolixa oratione inculcatur, metaphoricum non est. Est enim praeter rei naturam, ut metaphorae, quae proprio sensu falsae sunt, sint continuae.

Altera est: Locutiones, quarum veritas probatur, non sunt metaphoricae. Metaphora enim proprio sensu falsa est; frustra igitur in hoc sensu illius veritas probaretur.

Tertia est: Locutiones, quae admirationi, aut dubitationi locum dant, non sunt metaphoricae. Metaphora enim neque admirari, neque dubitare finit.

Quarta est: A familiari ac simplici oratione exsulant metaphorae: neque hae locum habent, si quis eos alloquitur, quorum caput illae excedunt.

Quod si obscurum aliquid occurrat: 1. totius orationis contextus accurate expendatur: 2. loca, quae vocant *parallela*, inspiciantur, ubi nimirum eadem vox, aut sententia occurrat: 3. aliorum interpretationes consulantur, eorum potissimum, qui auctoris linguam probe calleant, atque optime versati sint in ea re, de qua agitur.

PARS

P A R S II.

C A P U T I.

De Iudicio & Propositione.

Judicium est perceptio relationis, quae inter duas pluresve ideas intercedit. Nimirum Mens duas pluresve ideas confert, easque aut secum convenire, aut repugnare percipit: ac perceptae relationi assentitur. Hunc autem assensum tamdiu cohibere potest, donec ideas accuratius expendat: nisi illae summa perspicuitate praeditae mutuam relationem animo attendenti ultro offerant.

Interior isthaec Mentis actio, si verbis exprimitur, *Propositionem*, parit. Est itaque propositio oratio quae aliquid de aliquo enunciat agendo vel negando.

Tribus igitur partibus constat propositio, *subjecto* nimirum, *praedicato*, & *verbo*. Subjectum est, de quo aliquid enunciat: praedicatum, quod de aliquo enunciat: verbum subjecto praedicatum convenire aut repugnare declarat. *Copula* in Scholis verbum appellatur, quippe medium inter subjectum ac praedicatum, ea conjungit aut separat; quae propterea *termini*, seu *extrema* dicuntur.

Propositio autem recte duabus vocibus, aut una absolvi potest; si quidem tribus illius partibus

tibus virtute sua respondeant. Veluti si dicam, *Mens cogitat*, quod idem valet, ac *Mens est cogitans*: vel *Cogito*, quod perinde est, ac si dicam, *Ego sum cogitans*.

C A P U T II.

De Propositionum vario genere.

IN Propositione Scholastici considerant *materiam*, *quantitatem*, ac *qualitatem*. *Materiam* appellant terminos propositionis: *quantitatem* vero; *extensionem* notionis in subiecto: *qualitatem* tandem ipsius affirmationem, vel negationem.

I. *Propositio* quod ad illius *materiam* attinet *simplex* est, aut *complexa*, aut *composita*. *Simplex*, quae unico subiecto ac praedicato constat. Veluti *Corpus est extensum*.

Complexa, quae aliam *incidentem* propositionem complectitur; quae quidem incidens vel *definit*, vel *explicat* aut *ornat* subiectum. Primi generis est: *Triangula, quae sunt isoscelia, habent angulos ad basin aequales*. Alterius vero *Achilles, qui marinam Thetin matrem habuit, Hectorem devicit*.

Composita, quae pluribus subiectis & praedicatis coalescit. Veluti: *Odium & amor sunt utilia & noxia*.

II. Jam porro Propositionis compositio vel aperta est, vel latet. Aperta quidem est, cum Propositionis est

1. *Coniuncta*, in qua scilicet plura subiecta vel praedicata *copulativis* particulis coniunguntur.

guntur: *Non bene conveniunt, nec in una sede morantur majestas & amor.*

2. *Disjuncta*, ubi duo disjunctivis particulis separantur: *Imperat aut servit collecta pecunia cuique.*

3. *Hypothetica*, cujus duae partes hypotheticis particulis conjunguntur: quarum una *antecedens*, altera *consequens* dicitur: *Si lucet, dies est.*

4. *Causalis*, cujus partes pendent a causalibus particulis: *Possunt, quia posse videntur.*

5. *Discreta*, quae per adversativas particulas diversa exprimit: *Fortuna opes auferre, non animum potest.*

6. *Relata*, cujus una pars refertur ad aliam: *Tanti es, quantum habeas.*

Abdita est compositio, si propositio 1. est *Exceptiva*, quae a subiecto aliquid excipit: *Omnia sunt mortalia praeter spiritus*; duo sane adfirmantur, tum *spiritus esse immortales*, tum *cetera mortalia*.

2. *Exclusiva*, quae aut omne aliud praedicatum a subiecto, aut omne aliud subiectum a praedicato excludit: *Oculus videt tantum: Deus duntaxat est immortalis*. In hisce compositionem explicare facile est.

3. *Comparativa*, quae inter duas pluresve res comparisonem instituit: *Achilles fuit Hectore fortior*; ubi duo continentur, *ambos* nimirum *fuisse fortes*, tum *Hectore Achillem fortiozem*.

4. *Inceptiva*, quae alicujus rei initium docet.

5. *Desitiva*, quae exitum declarat. In iis duae

duae propositiones continentur; una enim respicit statum, in quo res antea erat; altera, quem posthac accepit.

III. Propositio, quod ad *quantitatem* spectat, est *universalis*, *particularis*, & *singularis*. Id a subiecto pendet, prout illud *universaliter*, *particulariter*, aut *singulariter* accipitur.

Quod si subiectum nullo adjuncto determinatur, propositio est *indefinita*: veluti, *senex est morosus*.

Universalis porro propositio aut *moraliter* talis est, aut *metaphysice*. Moraliter, si quam admittat exceptionem: ut *Omnes Cretenses sunt mendaces*. Metaphysice vero, si nulli subjiciatur exceptioni: ut, *Omnes circuli radios habent aequales*.

Nonnumquam propositio est universalis, licet species omnes, non autem singulae generis partes intelligantur: veluti si de quopiam dicatur, *cum Reipublicae magistratus omnes gessisse*.

IV. Propositio, quod ad *qualitatem* pertinet, est *affirmans*, vel *negans*: prima subiecto praedicatum adjungit, altera removet.

Propositio affirmans praedicatum subiecto adnectit in tota illius *comprehensione*, non vero *extensione*. Comprehensio autem dicitur quidquid proprietatum idea praedicati completitur: Extensio vero id omne, cui ipsa idea communis est. Ita cum *Triangulum esse figuram planam* ajo, triangulo adscribo quidquid figurae planae notio continet, non autem omnia, ad quae illa extenditur.

B

Con-

Contra propositio negans praedicatum qualitate patet divellit a subiecto, quamvis aliquid secum commune habeant. Ita *triangulum esse quadrilaterum* nego, quamvis in ratione figurae planae conveniant.

V. Propositiones opponuntur inter se, cum eodem constantes praedicato, & subiecto dissident inter se vel secundum *qualitatem*, vel *quantitatem*, vel utramque.

Propositiones qualitate tantum dissidentes, si sunt universales, dicuntur *contrariae*: ut *Omnis homo est liber*; *Nullus homo est liber*: Si particulares, *subcontrariae*; ut *aliquis homo est iustus*: *aliquis homo non est iustus*.

Quae vero quantitate tantum discrepant, dicuntur *subalternae*, ut *Omnis homo est liber*; *Aliquis homo est liber*.

Quae vero qualitate, & quantitate pugnant dicuntur *contradictoriae*; ut *Omnis homo est liber*: *Aliquis homo non est liber*. Sed ulus invaluit, ut contradictorias dicamus, quarum altera negat, quod altera ait.

C A P U T III.

De Propositionum Veritate & Falsitate.

Propositio si conjungenda componit, & sejungenda separat *vera* est; sin contra, *falsa*. Id autem dijudicamus, cum quae propositio enunciat perspecta habemus, eaque invicem conferimus, atque eorundem relationem expendimus.

Id facile in simplicibus propositionibus depre-

prehendere licet : at in compositis nonnulla sunt animadvertenda. 1. In complexa incidentis, quae subiectum definit, veritas, & falsitas in totam redundat propositionem; quae vero incidens subiectum explicat, nihil conducit ad veritatem, aut falsitatem illius.

2. Conjuncta vera erit, si partes omnes, unde constat, verae sint.

3. Disjuncta vera est, cum partes nihil medium admittunt.

4. Hypotheticae veritas pendet ex recta illatione; adeo quidem ut illa vera sit, quamvis utraque pars sit falsa.

5. Causalis vera erit, si quod exprimitur, vera sit alterius causa.

6. Discretae veritas consistit in partium oppositione.

7. Relatae veritas pendet ex recta relatione.

8. Exclusiva, & exceptiva verae censendae sunt, si quae a praedicato, aut subiecto excluduntur, recte excipiantur.

9. Comparativa vera est, cum ea, quae conferuntur, commune habeant praedicatum, in quo comparantur.

P A R S III.

C A P U T I.

De Ratiocinatione, & Syllogismo.

Ratiocinatio est actus intellectus, quo actu ipse instituta duarum idearum comparatione cum tertia, jungendae ne istae sint, an separandae, cognoscit. Hinc in ratiocinatione tria iudicia a Mente efformantur: Primum quo praedicatum cum tertia idea confertur: alterum, quo subiectum cum eadem comparatur: postrema vero, quo subiecti cum praedicato connexio, aut repugnantia colligitur.

Ratiocinationi perfecte syllogismus respondet. Est autem syllogismus argumentatio tribus propositionibus composita ita connexis, ut postrema e prioribus proficiscatur, Huiusmodi propositionum in Scholis prima dicitur *major*, secunda *minor*, postrema *conclusio*, sive *consequentia*. Major autem appellatur, quia *maius terminum*, hoc est, praedicatum conclusionis complectitur: Minor quia *minorem terminum*, h. e. subiectum conclusionis continet; ambae etiam *praemissae* vocantur. Tertium vero illud, cum quo praedicatum ac subiectum comparantur, *medius terminus* indigitari consuevit,

Tres

Tres itaque terminos complectitur syllogismus; duarum enim praemissarum altera praedicatum, altera subjectum cum medio termino comparat; conclusio vera ea connectit.

Jam vero recti syllogismi ratio ea est, ut conclusio in praemissis comprehendatur. Syllogismus enim eo respicit, ut *quaestionis* alicujus veritatem probet: *quaestio* autem est propositio demonstranda, quae locum conclusionis occupat in syllogismo: Quaeſtio porro probatur ope clarioris propositionis, quae illam complectatur. Quoniam vero iisdem verbis eam complecti nequit: alia propterea adjungitur propositio, quae in priori propositione quaestionem contineri ostendat.

Exemplum esto: probandum sit, *Mentem esse spiritualem*; id efficitur ope hujus propositionis, *Quod cogitat est spirituale*: quae sane quaestionem complectitur: idque aperitur aliam addendo propositionem, nimirum, *Mens cogitat*. Itaque cum intelligitur *id quod cogitat esse spirituale*, & illud patet, veluti in eo inclusum, *Mentem esse spiritualem*, quippe quae cogitat.

Eadem ratione, si demonstrandum suscipiam, *Mentem non esse corruptioni obnoxiam*; illud proponam, *spiritum corruptionem non posse subire*, tum & illud addam, *Mentem spiritum esse*. Cum enim nego *spiritum corruptionem subire*, nego etiam *Mentem eidem esse obnoxiam*, quippe quae *spiritus est*.

Generalis itaque canon in syllogismo efformando is est, ut praemissarum altera conclusionem complectatur, altera in illa eam com-

prehendi explicet. Altera scilicet *comprehensiva*, altera *explicativa* sit.

Id autem assequemur, si duo nobis expendenda proponamus. 1. Quenam in subiecti & praedicati ideis proprietates comprehendantur. 2. Quenam in eadem idea secum conveniant.

Ad recensitum canonem veluti ad obrussam syllogismi exigantur. Hinc recte procedere hunc Senecae syllogismum colligimus:

Qui id beneficium dedit, quo est aliquid melius, potest vinci:

Atqui Pater dedit filio vitam, qua est aliquid melius

Ergo Pater vinci potest.

At si tritum illud sophisma expendamus,

Quod ego sum, id tu non es:

Homo autem ego sum;

Homo igitur tu non es.

profecto hujus falsitatem nobis deprehendere datur.

C A P U T II.

De ceteris Argumentationum speciebus.

I. **E**Nthymema est veluti decurtatus syllogismus: si nimirum propositio, quae facile intelligi potest, reticetur. Ex. gr. *Servare potui; ergo possum perdere.*

II. Epichirema contra est syllogismus redundans: si nimirum majori, aut minori suae probationes adnectantur. Ex. gr.

Humanæ voluntatis appetitus immensus est: quo enim affluentiùs voluptates hauri-

*rimus, eo ardentius sitire experimur.
Atqui quaecunque hujus vitae bona finita
sunt; quippe e nihilo condita:
Voluntatis igitur appetitus praesentis vi-
tae bonis satiari nequit.*

III. Prosylogismus fit, cum uni syllogismo
ita alius subnectitur, ut primi conclusio sit
major alterius. Ex. gr.

*Spiritus partium expers est:
Mens autem spiritus est;
Mens igitur partibus caret.
Sed quod partibus caret, corrumpi nequit;
Ergo Mens corrumpi nequit.*

Penultima propositio minor subsumta in Scho-
lis vocatur.

IV. Sorites componitur ex pluribus propo-
sitionibus ita connexis, ut praedicatum unius
sit etiam subiectum alterius, atque ita dein-
ceps, donec primae subiectum cum praedica-
to postremae in conclusione jungatur. Ex gr.

*Mens est substantia cogitans,
Substantia cogitans est spiritus,
Spiritus partibus caret,
Quod partibus caret, non est dividuum,
Quod dividuum non est, corrumpi nequit;
Ergo Mens corrumpi nequit.*

Singulae porro propositiones verae sint oportet;
secus sorites in paralogismum degenerabit.

V. Dilemma, sive bicornis argumentatio,
rotum in duas partes dispescit, ut de toto
concludat, quod de singulis partibus ostendit.
Ex. gr.

Unusquisque in hac vita aut cupiditatibus

sefe addicit, aut iisdem oblectatur.
Si illis indulget, miser est; earum enim
sitim numquam explere poterit.
Si iisdem resistit, miser erit: nihil enim
hoc intestino bello molestius.
Nemo igitur vere beatam vitam agere pot-
est.

Nonnumquam propositio disjunctiva eleganti-
 us omittitur. Ne autem dilemma in sophi-
 sma degeneret, animadvertendum 1. ne propo-
 sitio disjunctiva aliquid medium admittat; 2.
 ut conclusiones ex partibus legitime deducan-
 tur: 3. ne retorqueri possit.

VI. *Inductio* ex pluribus particularibus enu-
 meratis aliquod universale colligit. Ex. gr.
Singuli siue summo siue infimo loco nati
curis exeduntur.

Unaquæque aetas sua patitur incommoda:
Hic improbos corporis fert labores: ille stu-
diis animum fatigat.

Praesens igitur hominis vita non est ab
omni parte beata.

C A P U T .III.

De Fallaciis Argumentorum.

PLura sunt in caussa, cur in argumentatio-
 nes fallacia derivetur: unde fit, ut syl-
 logismi in paralogismos ac sophismata dege-
 nerent.

I. *Aliud probare, quam quod est in quæ-*
stione. Vulgo appellatur *ignoratio elenchi*, il-
 lius scilicet, quod ostendendum est. Ex gr.
 Quan-

Quando nos sumus, mors non est; quando mors est, nos non sumus; mors ergo nihil ad nos. Atqui quaestio in eo versatur, num ipsum mori dolorem inferat.

II. *Quod in disquisitione positum est pro argumento sumere. Dicitur id solet petitio principii. Ex. gr. Unius substantiae ideam habemus; ergo una in rerum natura existit substantia. Nimirum pro explorato statuitur unius substantiae ideam dari, quod scilicet in quaestionem cadit.*

III. *Vitiosa circuitione uti. Vitiosum circulum vulgo appellant: nimirum cum idem probatur per idem. Ex. gr. Sidera incerrantia scintillant, quia maxime distant: longe vero distant, quia scintillant.*

Advertendum autem vitiosam non esse circuitionem, cum ex eo, quod aliunde constat, aliquid ostenditur; quo probato rursus illud inde demonstratur.

IV. *Tamquam causam rei accipere, quae causa non est. Ex gr. Dum Christianismus vigeret coepit, mille calamitates Romam oppresserunt; Christianismus igitur omnium calamitatum causa fuit. Quid enim illae cum Evangelio commune habuerunt?*

Huc revocatur inepta illa concludendi ratio: *post hoc, ergo propter hoc.*

V. *A sensu diviso ad compositum, & contra a composito ad divisum gradum facere. Si nimirum ea conjunguntur, quae recte intelligi nequeunt, nisi disjungantur: aut dividuntur, quae dividenda non sunt. Ex. gr. Sedens stare nequit: sedes; ergo numquam stare poteris.*

VI. *A dicto secundum quid ad dictum simpliciter.*

pliciter. Nimirum cum ex eo, quod certa quadam ratione verum est, quid generale colligitur. Ex. gr. *Nihil pulcrius humani corporis forma: pulcritudo omnis in Deo reperitur; Deus igitur humanam formam habet*. Humani sane corporis forma, si ad corpora referatur, pulcritudinem praefert.

VII. *Vitiosa enumeratione uti*. Scilicet cum ex paucissimis partibus recensitis, quod de iis probatum est, universe ad totum convenire colligitur. Ex. gr. *Oleum, vinum, urina, &c. cum in glaciem concrescunt; condensantur. Ergo omnes liquores congelati condensantur*. Atqui aqua glacie concreta rarefit.

VIII. *Vocum ambiguitate abuti*. Si nimirum nomen ambiguum, uno sensu cum subiecto, altero cum praedicato copulatur. Ex. gr. *Qui ait te esse animal, verum dicit: Qui autem ait te esse anserem, ait te esse animal; Qui igitur ait te esse anserem, verum dicit.*

C A P U T . IV.

De Caussis Errorum.

Errorum causae potissimum repetendae sunt ex *Praejudiciis, Cupiditatibus, Ebilantia, Negligentia, & Praecipiti Judicio*.

I. *Praejudicia*, sive *praejudicatae opiniones* sunt praekoncepta citius, quam par est, animo iudicia. Ea proficiscuntur. i. ex *partium studio*: cum nimirum certis quibusdam destinatisque sententiis addicti & consecrati sumus; unde fit, ut constantiae causa vel quae non probamus

mus defendere cogamur. 2. ex *auctoritatis aestimatione*: cum scilicet ex alienis iudiciis ita pendemus, ut etiam sine ratione apud nos valeat auctoritas. 3. ex *disputationis amore*: si nimirum privatae opinionis studio incensi contradicendi prurigne abripiamur. 4. ex *multitudinis sensu*; si nimirum vulgi opiniones pecudum more, nulla addibita ratione, sequimur. Jam vero Mentis nostrae ratiocinia certis quibusdam principiis reguntur. Si igitur praeiudiciis illa innituntur, perversa omnino erunt, atque errandi facilem occasionem dabunt.

II. Cupiditates cum animum immutent, immutant etiam iudicia, quae de rebus objectis feruntur. Ea igitur pervertunt.

III. Cupiditatum maxima est philautia; amore enim sui captus homo eam, quae sibi arridet sententia, veram esse tuetur, aliorum rationibus omnino posthabitis.

IV. Negligentia ac taedium laboris veritatis comparandae adversatur.

V. Tandem errandi causam plerumque affert praeeptis iudicium. Cum enim extemplo ac temere perceptae idearum relationi assentimur, vix imo ne vix quidem fieri potest, ne decipiamur.

P A R S IV.

De Methodo.

M*ethodus* a Philosophis nuncupatur ars illa, qua cogitationes nostras eo ordine disponimus, ut ad veritatem inveniendam, eamque aliis explicandam ducamur.

Duplex igitur est, altera *analytica*, sive *resolutionis*, altera *synthetica*, sive *compositionis*. Priore veritas investigatur, posteriore veritas inventa docetur.

Ambae in eo conveniunt, quod a notis ad ignota progrediantur; idque adsequantur per conclusiones, quae a semel cognitis deducuntur.

Discrepant vero: quod Methodus analytica veritatem investigat per resolutionem compositorum in simplicia, ac totius in partes, ac paulatim a singularibus ad universalia progreditur.

Contra Methodus synthetica generales veritates proponit, unde singulares deducit, atque ab universalibus ad particularia descendit.

C A P U T I.

De Methodi Analyticae Regulis.

I. **P**ropositae quaestionis status probe expendatur. Quaevis sane quaestio certos quosdam praefert characteres; unde intelligere datur, quidnam quaerere oporteat. Eos cognitos habeamus; secus enim incerti vagabimur.

Ea propter conditionibus, si quae sint, prospiciamus: hae quidem neglectae difficilem reddunt quaestionem: intellectae vero ejus solvendae viam aperiunt.

Porro quaestionis status recte definitur, si verbis perspicuis, quae ambiguitate careant, ea proponatur. Ita ex gr. si quaeratur *caussa soni*, ita planius quaestio proponetur: *Quid sit illud, quod tum aeri pulsato, tum ex hujus percussione auribus accidat, unde soni perceptio excitatur.*

II. Diversae ideae in quaestione occurrentes separentur; facilius enim in plures peculiares quaestio soluta expeditur. Hinc proposita quaestio ita divideretur: 1. *Quid aeri pulsato contingat, quidve illud praestet*: 2. *Cui tribuenda sit communicatio inter corpus sonorum & aures*. 3. *Quid auribus ipsis accidat.*

III. Argumenta investiganda sunt, unde peculiares quaestiones solvantur. Nimirum excutere oportet, quae pertinent ad ea illustranda, de quibus agitur. Hinc 1. *comperiemus* aures, dum percutitur, affici tum motu oscilla-

torio sui ipsius, tum motu tremulo exiguarum partium ejusdem. Experimenta autem nobis ostendent ex motu potius tremulo sonum esse repetendum.

2. Inter aes atque aures lucem atque aërem interjici animadvertemus: lucem nihil conferre intelligemus; quippe noctu etiam sonus auditur; uni ergo aëri soni communicationem adscribendam esse colligemus. Communicatur autem, quia eodem tremore, quo partes corporis sonori oscillant, circumjectus aër afficitur; qui eo veluti undante ad aures usque devehitur.

3. Inspecta aurium structura intelligemus modum tremulum tympano communicatum diffundi per interioris auris cavum, atque inde concuti nervum acusticum.

IV. Quidquid inventum est colligatur in unum, ut propositae quaestionis solutio habeatur.

C A P U T II.

De Methodi Syntheticae Regulis.

Geometrae, quibus utraque methodus peculiaris est, cum inventas veritates aliis proponunt, tria sibi exsequenda praescribunt.

1. A vocibus ambiguis abstinere: hinc vocum, quibus utuntur, definitiones praemittunt. 2. Ratiocinationes perspicuis principiis adstruunt: idcirco axiomata proponunt. 3. Demonstrativis argumentis omnia ostendunt; hinc ipsorum theoremata ac problemata definitionibus, axio-

axiomatis, & propositionibus demonstratis innituntur.

Haec autem Methodus suis regitur regulis, quarum duae definitiones, tertia axiomata, ceterae duae demonstrationes respiciunt.

I. Nullum vocabulum subobscurum, aut ambiguum sine definitione adhibeatur: potissimum si sint *technica*, h. e. *cuique arti propria*.

II. In definitionibus vocabulis notissimae significationis aut explicatis utendum.

III. Nihil loco axiomatis habeatur, quod non sit evidens. Hinc 1. cum in propositione subiecti ac praedicati mutua relatio mediocri attentione adhibita ipsa per se animo objicitur; axioma erit ea propositio, 2. Si propositione inspecta huiusmodi relatio statim nonprehenditur; ea non erit axioma.

IV. Nihil in demonstrationibus adhibeatur praeter definitiones, axiomata, & propositiones jam demonstratas.

V. Numquam in iis ambiguitate vocum abutendum.

METAPHYSICAE ELEMENTA .

Metaphysica est ea philosophiae pars, quae *contemplatur res a corporea concretionē sive reapse immunes, sive vi mentis abstractas.* Ea porro in tres partes dispertitur; altera de Ente, ejusque affectionibus agit, dicta propterea *Ontologia*; altera humanae Mentis naturam, ejusque dotes prosequitur, ac *Psychologia* nuncupatur: tertia Dei existentiam, atque attributa rationis lumine perscrutatur; quae idcirco dicitur *Theologia*.

METAPHYSICAE PARS I.

ONTOLOGIA.

C A P U T I.

De Principiis cognitionis humanae.

§. I. De Principio Contradictionis.

Vulgatum axioma, *Impossibile est idem simul esse & non esse*, nuncupari solet in Scholis *Contradictionis principium*, quia contrafactes sibi ipsos *contradicere* ostenditur, cum per illud indirecte demonstratur aliquid, quod ipsi negaverint.

Hoc

Hoc porro axioma nostrarum cognitionum principium est, quae in rebus necessariis versantur. *Necessarias* appellamus ejusmodi res, quae uno duntaxat pacto determinari possunt. Est autem harum cognitionum principium, quia ipsarum veritas ex eo axioma proficiscitur, in eo innititur, atque ad illud revocatur.

PROPOSITIO. *Contradictionis principio innitur veritas cognitionum, quae ad res necessarias attinent.*

Prob. I. Illud veritatis fundamentum est, quo stante suarum cognitionum certa Mens est; quove sublato, incerta est. Atqui stante Contradictionis principio suarum cognitionum certa Mens est, incerta vero eo convulso. Ergo.

Demonstr. Minor. Esto, idem simul sit, & non sit; ergo trianguli rectilinei duo latera eodem temporis vestigio tertium excedunt, & non excedunt. Cum igitur ea tertium superare percipio, hujus cognitionis certus non sum. Ergo pessum ibit veritas nostrarum cognitionum, quae res necessarias respiciunt, si contradictionis principium convellatur.

Prob. II. Nostrae cognitiones versantur circa res necessarias, possibiles, atque impossibiles: Atqui hujusmodi notiones ad Contradictionis principium revocantur. Ergo.

Prob. Minor quod ad singulas partes. 1. Necessarium dicitur, cujus oppositum esse nequit, quippe contradictionem involvit. Atqui id ad laudatum axioma revocatur. Ergo. Nam si quod necessario opponitur, verum esse ad-

C

mit-

mitteretur; res eadem simul esset, & non esset. Notio igitur rei necessariae ad Contradictionis principium revocatur.

2. Possibile dicimus, quod nullam contradictionem complectitur. Atqui id revocatur ad laudatum axioma. Ergo. Nullam complecti contradictionem idem valet, ac non fieri, ut res eadem simul sit, & non sit. Ergo.

3. Impossibile dicitur quod contradictionem complectitur. Id autem revocatur ad laudatum axioma. Ergo, Illud contradictionem complectitur, quo posito res eadem simul esset ac non esset. Rem igitur impossibilem ex laud. axiomate definimus.

Hinc valet illud plurimum in demonstrationibus *indirectis*, ut ajunt. Nimirum admissa contraria adversariorum hypothese, ex ea efficitur idem simul esse & non esse: uti videre est apud Geometras.

Prob. III. Hujus axiomatis rivulus est illud, *Idem subjectum proprietates secum pugnantes complecti nequit*: Atqui ad effingendas singularem rerum ideas hoc axioma plurimum conducit. Ergo.

Objicies I. Cognitionis humanae principium illud est, unde veritates omnes, quae in eo delitescunt, explicantur. Atqui ex laudato axiomate nullae veritates abditae educuntur. Ergo.

Resp. Distinguo majorem, atque hujusmodi denominatio iis duntaxat tribuenda est, unde veritates abditae hauriuntur, nego: aliis etiam tribui potest, concedo. Nomine quidem principii cognitionis humanae illud intelligimus, cui

cui innititur veritas nostrarum cognitionum . Atqui allata superius argumenta suadent cognitiones nostras , quae versantur in rebus necessariis , suam haurire veritatem ex Contradictionis principio . Jure igitur illud statui potest hoc sensu humanae cognitionis principium .

Objic. I. Laudatum axioma humanae cognitionis principium recte statueretur , si illius veritas consisteret . Atqui Dei potentia fieri potest , ut idem simul sit , & non sit . Ergo . Id autem a Deo fieri potest ; quia illius scientia ac potentia infinita est ; atqui limitibus circumscriberetur , si a Deo fieri non posset , ut idem simul esset , & non esset . Ergo .

Resp. neg. min. Quod enim *absolute* impossibile est , id ne a Deo quidem fieri potest : ut inferius demonstrabitur . Nullis vero terminis Dei potentia propterea coercetur ; neque enim illius obiectum est , quod nihil est : quod autem idem simul sit , & non sit , perinde est , ac si nihil dixeris .

§. II.

De Principio Rationis sufficientis .

Veritates *contingentes* dicuntur , quarum determinatio magis haec , quam illa necessaria non est : *Ratio* autem *sufficiens* dicitur id omne , unde intelligitur , cur aliquid sit .

Apud omnes constat nihil omnino esse sine ratione sufficiente . Nimirum quaecunque esse

ac non esse, hoc vel alio pacto esse possunt, ab aliqua ratione determinantur oportet, ut potius sint, quam non sint, ut hoc magis, quam alio pacto sint. Ratio igitur sufficiens veritates respicit contingentes.

Haec porro ratio sufficiens non una est. Effectuum enim, qui in hac rerum universitate producantur, ratio sufficiens est eorundem causa, a qua tamen effectum proficisci deprehendatur. At ratio sufficiens, unde causae liberae ad agendum sese determinant, sita est in boni & mali rationibus, quae in objectis deprehenduntur: haec propterea *motiva* nuncupantur.

In antecessum autem advertendum est huiusmodi *motiva*, sine quibus liberae causae non agunt, earum libertati non offere. Nam I. quod ad humanam voluntatem attinet, *motiva* alia sunt *completa*, alia *incompleta*: illa objectum ita Menti repraesentant, ut nulla mali species in eo deprehendi possit; haec vero rem ita objiciunt, ut boni defectus aut mali ratio in ea deprehendi possit. Hominis porro voluntas cum determinatur, *motivis incompletis* ducitur. Atqui haec nullam libertati vim inferunt. Ergo.

Et sane voluntas naturali necessitate determinatur, cum objectum totum explet ipsius appetitum. Explet autem, cum nulla ipsi inest ratio mali, aut defectus boni; cuiusmodi est *bonum in communi*, & *Deus clare visus*. Atqui cetera quaecunque objecta ejusmodi sunt, ut & mali rationem, & boni defectum in ipsis inspicere liceat. Ergo.

II.

II. Quod vero ad Deum spectat : motiva vel a rebus objectis desumuntur, vel ab ipso agente: illa *objectiva*, haec *subjectiva* appellare licet. Subjectiva quidem agentis libertati officere non possunt; quippe e seipso haurit rationes, cur agat. Atqui Deus subjectivis motivis ducitur; is enim rerum omnium rationes in se comprehendit, sibi que sufficit; ex infinita igitur sui essentia rationes elicit, unde agat.

PROPOSITIO. *Nihil est sine ratione sufficiente.*

Prob. I. Si quid est sine ratione sufficiente, nihil erit, unde intelligatur, cur illud sit. Illud igitur existit, cum nihil esset, unde oriretur. Atqui absurdum est, nihil fieri, aut efficere aliquid. Ergo.

II. Si quid est sine ratione sufficiente, rerum omnium veritas uno temporis momento consisteret. Atqui hoc absurdum. Ergo. Prob. maj. Res in eodem statu perseverat, si nulla mutationis ratio adsit: Si quid igitur sine ratione esse potest, singulis momentis res mutationi sine ratione subjicerentur. Earum igitur veritas uno duntaxat momento consisteret.

III. Si quid est sine ratione sufficiente, sine Deo mundus potuit esse. Atqui hoc absurdum; ergo & illud.

IV. Si quid est sine ratione sufficiente, nullum vigiliam inter & somnum discrimen esset. Discrimen autem interest. Ergo. Prob. maj. Ea, de quibus somnium facimus, nullo secum nexu respondent, quia nec volentes nec consulti

sulti ea agimus. Si nulla igitur nostrarum actionum ratio esset, vigilantes somniaremus.

Objic. I. Voluntas non raro sine motivis sese determinat. Ergo. Prob. antec. Finge cuidam duos ejusdem pretii nummos offerri, ut alterutrum eligat. Atqui nulla ratio esse potest, cur unus prae altero eligatur. Alterutrum igitur sumet, nulla ductus ratione.

Resp. neg. min. Rationes enim vel intrinsecus insunt objectis, vel saltem extrinsecus. In ejusdem pretii duobus nummis, nulla quidem ratio eorum alterutri intrinsecus inest, cur alteri praeferatur. At si alteruter Evandri manibus, ut ille ait, tritus, vel alicujus amici fuerit; haec quidem ratio erit, cur alteri praeferatur. Quod si haec etiam desit, consuetudo agendi familiaris praestabit, ut ille nummus eligatur, qui manui propior est, qua utitur quis, cum de mensa aliquid sumere solet.

Objic. II. Nulla adest ratio, cur velimus ea, quae deteriora judicamus. Atqui meliora videmus, & deteriora sequimur. Ergo.

Resp. dist. maj. Nulla ratione volumus ea, quae deteriora judicamus *judicio practico*, concedo; *judicio theoretico*, nego. Atqui sequimur deteriora, quae ejusmodi nobis videntur *judicio theoretico*, concedo; *practico*, nego. Duplici quidem ratione res objectas Mens considerat: eas vel generaliter & in se ipsis inspicere solet, *speculativo* quodam judicio: vel prout ipsa versatur in eo statu, in quo agit, *practico* judicio, quod scilicet proxime actionem ipsam praecedat. Fieri autem solet, ut res generaliter inspectae bonae judicentur: non item

item vero, si ad cupiditates, ad praejudicia, ad praesentis conditionis statum referantur.

§. III.

De Criterio Veritatis.

Character ille, quo vera a falsis dijudicantur, *Criterium* appellatur. Id autem in *Evidentia* constituitur. Eaque triplex est *metaphysica*, *physica*, & *moralis*.

Prima obtinet in scientiis purae intellectio- nis; estque summa illa perspicuitas, qua attribu- tum subjecto convenire aut repugnare percipi- tur. Duplex porro est, vel *simplicis intuitio- nis*, vel *demonstrationis*. Illa habetur, cum idearum convenientia aut repugnantia primo Mentis intuitu deprehenditur: haec autem, cum a certis principiis necessaria illatione de- ducitur. Primi generis sunt axiomata, alte- rius theoremata apud Mathematicos.

Altera versatur in iis, quae sensibus perci- piuntur; eaque proficiscitur ex constanti & manifesto sensuum testimonio. Ejusmodi sunt pleraeque naturae leges, quas ope sensuum constanter omnes percipimus.

Tertia tandem locum habet in iis, quae ex historia discimus; eaque repetitur ex con- stanti & publico hominum testimonio. Ejus- modi sunt pleraque historica monumenta.

PROPOSITIO. *Adest nobis veritatis Crite- rium, illudque in Evidentia situm est,*

Demonstr. pars prima I. Suae providentiae debet Deus, ut hominem auxiliis instruat,

quibus assequatur id, ad quod propriae naturae conditione agitur. Atqui veritatis inquirendae studium natura ipsa nobis ingenuit. Ergo.

II. Si adipiscendae veritatis artem homini denegavit Deus, vel impotens, vel crudelis esset. Vtrumque ab ipsius praestantia ac bonitate alienum est. Ergo.

Demonstr. pars altera. I. Criterium veritatis est, quo verum a falso discernitur. Discernitur autem per Evidentiam, Ergo. Prob. min. Verum a falso id discriminat, quod verum ita Menti objicit, ut illud verum non esse sibi persuadere nequeat. Atqui cum mutuam idearum relationem perspicue percipimus, huic perceptioni omnino acquiescamus oportet. Ergo.

II. Veritatis amore incendimur. Atqui si Evidentia veri criterium non esset, ad falsitatem duceremur. Id autem repugnat. Ergo. Prob. min. Evidentibus natura cedimus. Sicut igitur vera non essent, falsis natura ducente assentiremur.

§. IV.

Confutatur Scepticismus.

SCeptici nuncupantur, qui sola rerum perceptione contenti nihil decernunt: ea propter nihil veritati relinqui, deque omnibus dubitandum esse dicunt. Ipsorum argumenta in tres classes dispesci possunt: 1. nullum esse veri criterium: 2. Evidentiam falsitati esse

se obnoxiam : 3. nihil prorsus cognosci . Ea igitur refutanda sunt .

Objic. I. Ut vera a falsis internoscantur , criterio opus est . Ut autem criterium comparetur , verum a falso criterio discernere oportet . Ergo criterii aliud criterium , atque hujus aliud praeterea , atque ita deinceps usque in infinitum investigandum erit . Repugnat autem progressio in infinitum . Ergo .

Resp. neg. min. Prima regula alia non indiget ; neque ea per longas ratiocinationes extundenda est . Evidentia enim ita sese nobis offert , ut eam certam veritatis comitem esse agnoscamus .

Objic. II. Criterium quod vulgo statuitur , veritatem non praefert . Ergo . Et 1. de Evidentia morali . Testimonium hominum qui decipiuntur , ac decipiunt , ut veritatis criterium statui nequit . Atqui tum profana , tum Ecclesiastica historia historicos deceptos esse , atque aniles fabellas extruxisse aperte suadet . Ergo .

Resp. dist. maj. Criterium veritatis non est testimonium eorum , qui reapse decepti sunt vel alios deceiverunt , conc. qui licet possunt decipi , aut decipere , neque tamen deceptos aut decepisse constat , nego . Nimirum his dotibus ornentur oportet historici , quorum testimonio fides adjungitur , tum ut ipsi decepti non sint , tum ut alios decipere noluerint . Id autem certo constare nobis potest .

Et 1. quod historicus non fuerit deceptus :
1. Si ea testetur , quae suis subjecta sensibus
fuere : 2. Si ea narret , quae a suis popula-
ribus

ribus visa vel audita fuerint : 3. Si quae refert , sui vestigia & monumenta posteris animadvertenda reliquerint : 4. Si quae tradit , in publico hominum conspectu gesta sint : 5. Si ex publicis annalibus exscripserit ea , quae narrat . 6. Si nullo partium studio ductus ea perhibeat , quae illius animum afficere non poterant .

II. Quod autem decipere noluit ; 1. Cum ea narrat , in quibus si mentitus esset , publicas querelas & contumelias in se excepisset : 2. Cum nec sua nec suorum interest mentiri : 3. Cum narrat , quae sui suorumque popularium decus offendunt . 4. Cum non dissentit ab aliis historicis : 5. Cum ea , quae scribit , non abhorrent a suae aetatis & patriae moribus . 6. Cum loco , tempori , quo res evenisse narratur , apte respondent .

Objic. III. Sensuum testimonium verum esse inde probatur , quod si nos fallerent , error omnis Deo esset tribuendus . Atqui argumentum hoc nimis probat . Ergo . Prob. Min. Colores , odores , sapores , ceterasque sensibiles corporum qualitates rebus ipsis inhaerere sensus nos docent . Id autem falsum est . Hujusmodi igitur error Deo tribuendus esset . Atqui id fraudi Deo non vertitur ; quippe qui persuasit duntaxat , ut ita nobis videri arbitramur , non ut pro explorato haberemus , reapse corporibus inesse qualitates sensibiles . Quamvis igitur corpora nulla sint , erroris origo a Deo repetenda non est .

Resp. neg. consequ. Nulla quidem Deo fallacia adscribi potest , quod sensibiles qualitates

res rebus ipsis inhaerere hominis existiment . Quo enim attentius illas inspicimus , eo clarius eas Mentis nostrae affectiones esse cognoscimus . Nobis igitur vitio vertendum est , si easdem , quae a nobis percipiuntur , corporibus qualitates inesse opinamur . Verum quo attentius corporum ad meos sensus appulsus inspicio , eo difficilius mihi persuadere possum , ut illa non existant , eaque non sint , nisi Mentis meae perceptio . Jure igitur fallacia Deo adscribenda esset , si sensuum testimonio ducti corpora , quae nusquam sint , reapse existere putaremus .

Objic. IV. Plura sunt , in quibus sensus nos decipiunt . Ergo .

Resp. dist. antec. Sensus nos decipiunt , si seorsum accipiantur , si regulae negligantur , si rationis ductu destituantur , conc. secus , nego . Ne igitur errandi occasionem nobis praebeant sensus , plura advertenda sunt . 1. Ut sensus sint integri . 2. ut eorum imbecillitas instrumentis adjuvetur . 3. ut intervallum inter objecta & sensus ipsorum potentiae respondeat . 4. ut aut plures sensus , si fieri potest , adhibeantur , aut iterum ac tertio eidem sensui res subji- ciatur . 5. In judicio eorum , quae sensibus percipiuntur , celeritas omnino vitetur .

Instant : Atqui non ex regulis neglectis , sed ex ipsis sensibus erroris origo repetenda est . Ergo . Sensus ita conformati sunt ut veras corporum proprietates minime nobis exhibeant . Ergo .

Resp. dist. antec. Corporum proprietates absolutas ope sensuum non cognoscimus , conc.

relativas, nego. Incomperta quidem nobis est physica & absoluta corporum magnitudo, durities &c. haec enim *relative*, h. e. prout sensibus nostris apparent, cognoscimus. Fallaces autem propterea sensus non sunt; ideo enim attributi nobis sunt, ut ipsorum ope assequeremur, quam cum nostro corpore externae res relationem habent.

Objic. V. Si Evidentia veritatis norma esset, ea nunquam ad errorem duceret. Atqui ea duce plerique errant. Ergo.

Resp. dist. min. Errant ducti Evidentia *falsa* sive *putata*, conc. *vera*, nego. Qui errores tuentur, ab evidentia duci sibi videntur, licet nulla adsit evidentia. Distinguitur autem vera a falsa evidentia; haec enim ita Mentem afficit, ut ipsa assensum cohibere possit; illa vero assensum omnino extorqueat. Illius igitur character est *invincibilitas*, h. e. *resistendi impotentia*, quae Mentis praejudicia & cupiditates antecedit.

Objic. VII. Deus potest omnia. Praestare igitur poterit, ut fallar etiam in iis, quae evidenter percipio. Ergo nihil certi percipitur.

Resp. neg. consequ. Perspicua enim atque evidens falsi notio nulla est. Falsum enim idem est, ac quod neque est, neque *essendi* rationem habere potest. Nihilo autem nulla directe respondet notio. Ita cum teneam quid totum, quid pars sit, nunquam evidenter percipiam, partem toto esse majorem.

Objic. VII. Nihil certi perciperetur, si attributi cum subiecto convenientia vel repu-
gnan-

gnantia apprehendi non posset . Atqui id assequi non licet . Ergo . Prob. Minor Attributum subjecto convenire aut repugnare deprehenditur , cum hujus essentia comperta est . Incomperta autem est rerum omnium essentia . Ergo .

Resp. neg. major. Intelligere enim datur rei alicui attributum convenire aut repugnare, siquidem illius nonnullas proprietates cognitae habeamus . Nam si cum notis rei proprietatibus attributum componi posse, aut punare deprehendimus ; inde colligimus rei ipsi illud convenire aut repugnare . Valet enim axioma: *idem subjectum proprietates secum pugnantes completi nequit* .

§. V.

De prima Veritate cognita .

UT quod primum nobis innotescit deprehendatur ; definiendum antea, utrum singularia an universalia prius cognoscantur ; tum cujusmodi sint primae cognitiones .

PROPOSITIO I. *Singularia prius cognoscuntur .*

Prob. I. Omnis nostra cognitio e sensu tum intimo tum extimo proficiscitur : ut suo loco docebitur . Atqui singularia duplici huic sensui subjiciuntur . Ergo . Prob. Minor : Sensui subjiciuntur, quae reapse existunt . Universalia autem non existunt , existunt singularia . Ergo .

Prob. II. Ea primum cognosci nequeunt , quae

quae ex aliorum cognitione oriuntur . Sed universalium cognitio e singularibus proficiscitur . Ergo .

PROPOSITIO II. *Per characteres communes res prius cognoscuntur .*

Prob. Ii characteres primos sese nobis offerunt , qui magis in rebus affulgent . Atqui ejusmodi sunt characteres cum aliis rebus communes . Ergo . Proprietates quidem communes in re quapiam veluti magis extant , quam privatae ; eaeque primum sensus afficiunt . Prius enim rem esse , ad hoc vel illud genus pertinere , in hac vel illa specie comprehendi , quam certam quamdam rem esse certis quibusdam proprietatibus a ceteris distinctam cognoscimus . Nimirum primae rerum cognitiones obscurae sunt .

PROPOSITIO III. *Se ipsam existere Mens prius cognoscit .*

Prob. I. Illud primum omnium cognoscimus , quod nobis magis intime adhaeret . Nihil autem Menti magis intimum est , quam ipsa sibi . Ergo .

Prob. II. Principem locum obtinet ea cognitio , sine qua ceterae nullae sunt . Atqui nisi prius se existere Mens novit , se aliquid percipere sibi persuadere nequit . Ergo .

C A P U T II.

De Ente , ejusque formis .

L Atinis *Ens* dicitur *quod est* ; huic *Nihil* opponitur , *quod nimirum non est* . Primum

num valet notione positiva, alterum negativa. Nihil igitur nullam *directe* notionem habet, *indirecte* autem ens, quod negat, exprimit.

§. I.

De Essentia atque Exsistentia.

Essentia definitur *id, per quod res est id, quod est*. Triplex autem distinguitur, *physica, logica, metaphysica*.

Prima est *id, per quod Ens certum quoddam ens constituitur*. Altera, *id per quod Ens tale concipitur*. Tertia demum est *id, quod primum in Ente concipitur*, proprietas nimirum illa, in qua ceterae comprehenduntur.

Rerum essentiae considerantur, vel prout in Mente Dei continentur, vel prout extra Deum exsistunt: Illae aeternae sunt atque immutabiles: hae vero factae ac mutationi obnoxiae.

Exsistentia est *id, per quod aliquid revera existit*. Est autem *possibilis, vel actualis*. Prima est illius Entis, quod sufficientem exsistentiae rationem habet. Altera est illius, quod extra sui causam est.

Exsistentia vel est *a se, sive per essentiam*; vel *ab alio sive contingenter*. Unius Dei est a se existere; quippe ipsa illius essentia ratio est, ut existat. Cetera quaecunque, quippe a Deo condita, rationem, cur existant, in Deo, non in seipsis habent.

§. II.

§. II.

De Ente Rationis & Reali.

ENs *rationis*, sive *intelligibile* est, quod a Mente pendet, ut existat; cujusmodi sunt illius actus, affectiones, ideaeque factitiae, *Reale* vero, quod reapse existit.

§. III.

De Ente Possibili & Impossibili.

Possibile dicitur quod non est, sed esse potest. Ejusmodi autem est vel *intrinsicus* & *absolute*, vel *extrinsicus* & *relative*.

Primo sensu possibile dicitur, quod non repugnat; veluti *alter mundus*. Secundo sensu quod supernaturalis, vel naturalis causae viribus effici potest.

Impossibile est illud, quod nequit existere. *Intrinsicus* quidem & *absolute*, si omnino repugnet, ut *mons sine valle*: *extrinsicus* vero & *relative*, quod causae alicujus viribus non subjicitur: *moraliter* tandem, quod inspecta hominum indole nunquam usuvenit.

Quod est *absolute* impossibile, ejusmodi est *relate* etiam ad Deum. Quod enim repugnat idem est, ac nihil; entis nimirum rationem habere nequit. Atqui ea Deus praestare potest, quae in sui essentia complectitur: complectitur autem quidquid est, aut rationem entis habere potest. Ergo.

§. IV.

§. IV.

De Ente Necessario & Contingente.

Necessarium est, *cujus oppositum est impossibile*. Multiplex est. 1. *Necessarium existentiae*, quod nimirum a se existit. 2. *necessarium essentiae*, *cujus immutabilis est essentia*. 3. *necessarium ad existentiam*, *sine quod aliud existere nequit*. 4. *necessarium ad essentiam*, *quod sine essentiae iactura a re divelli nequit*. 5. *necessarium hypothetice sive moraliter*, *cujus oppositum hypothetice vel moraliter repugnat*.

Ens autem contingens est illud, *quod ita est, ut possit non esse; vel ita non est ut possit esse*: quodcunque nimirum existit ab alio.

§. V.

De Substantia & Accidente.

Entis formae sunt Substantia & Accidens, de quibus supra in priori Logicae parte *Cap. 1. num. 1X.*

C A P U T III.

De Attributis Entis .

§. I.

De Unitate .

ENs unum dicitur, h. e. indivisum in se, & distinctum a quolibet. Est autem unum vel simplex, quod partibus caret: vel compositum, quod iisdem conflatur. Partes vero aliae sunt physicae, aliae mathematicae, aliae metaphysicae, aliae logicae.

Partes physicae, quae reapse inter se distinctae totius essentiam constituunt; ut *Mens & corpus* in homine.

Partes mathematicae, quae ad totius integritatem pertinent; ut *crura, manus* in corpore humano.

Partes metaphysicae, quas veluti distinctas in Ente considerant Metaphysici, ut *essentia & existentia*.

Partes logicae, quas veluti distinctas logici in Ente inspiciunt, ut *genus & differentia*.

Cujusmodi sunt partes, ita est totum inde compositum: cui simplex adversatur, prout varii generis partes excludit.

Unitas vel est *numerica*, quae cujusque singularis entis propria est: vel *specificata*, quae ejusdem speciei entibus convenit.

§. II.

§. II.

De Individuo, Supposito, & Persona.

ENs dicitur *individuum*, quippe in pluralia, quale ipsum est, dividi nequit. At naturae individuum substantiam designat non modo singularem, sed quae sui juris sit, atque integrum principium suarum actionum. Quae sane substantia *suppositum* appellatur, si ratione non utitur: *Persona* vero, si rationis est particeps. Hinc a Boëtio definitur *Persona, naturae rationalis individua substantia*.

§. III.

De Identitate & Distinctione.

Identitas est relatio Entis ad ipsum non mutatum, quamvis locus vel tempus commutetur.

Varia tamen notione accipitur. Nam 1. *idem* aequè valet, ac *perseverare in existendo*. 2. *Idem* dicitur illud, quod nullam suae conditionis subiit vicissitudinem. 3. *Idem* nonnunquam *specie* est, non *numero*.

Distinctio alia est *realis*, alia *rationis*. Illa est in re ante omnem Mentis conceptum; quemadmodum Sol a Luna, Mens a corpore humano distinguitur: haec vero per Mentis conceptum excogitatur in iis, quae revera non distinguuntur.

Distinctio rationis alia dicitur *rationis va-*

tiocinatae, alia *rationis ratiocinantis*. Primam admittimus, cum in re plura distinguimus, vel ob illius virtutem *eminenter* multiplicem, vel ob varios, quos praestat, effectus. Veluti cum in uno eodemque frumento *seminis*, *fructus*, *alimentique* rationes distinguimus. Haec autem licet tota sit penes intellectum, in re tamen *fundamentum habet*, quippe quae pluribus aequivalet.

Altera utimur, cum solo ducti arbitrio *sine aliquo fundamento* plura in re distinguimus: veluti cum *subjecti & praedicati* rationes in re aliqua distinguimus.

§. IV.

De Veritate & Bonitate.

Veritas triplex est, *logica*, *moralis*, & *metaphysica*. Prima sita est in idearum convenientia cum objectis: altera in signorum externorum convenientia cum animi notionibus: tertia in rerum convenientia cum eorum exemplari, sive idea divina.

Hanc ultimi generis veritatem *entitativam* etiam ac *naturalem* appellant. Singulae enim res, utpote summa Dei sapientia conditae, ideae divinae respondent.

Bonitas alia est *absoluta*, alia *relativa*. Illa consistit in *perfectione*; haec in *apto & convenienti*. Perfectum autem illud est, quod in suo genere expletum & cumulaturn est. Aptum vero & convenient, quod ad usum quemdam sive commodum refertur,

Ita

Ita Deus cum perfectissimus sit, absolute bonus est, ac bonitatem omnem in se complectitur. Quia aurem absolute bonus, tum sibi, tum creatis rebus relative bonus est; sibi quidem, quia in se uno beatissimus: ceteris vero, quia eas condidit, & conservat, atque intelligentibus creaturis beatificus finis est.

Ita etiam res creatae suo sensu bonae sunt tum absolute, tum relative. Absolute quidem, cum iis omnibus proprietatibus exornentur, quae ad earum essentiam constituendam necessariae sunt. Relative autem, cum aliae aliis usui sint, atque emolumento.

§. V.

De Duratione.

Duratio dicitur *continuata Entis existentia*. Illius duae sunt species *Aeternitas* ac *Tempus*.

Aeternitas proprio sensu accepta est *interminabilis vitae tota simul & perfecta possessio*. Nimirum Dei existentia, qui initio ac fine carens vitae plenitudinem nulla successione possidet.

Tempus vero est duratio initio ac fine conclusa, quae praeteriti ac futuri successionem habet.

Tria igitur Aeternitatem a tempore discriminant. 1. Aeternitas propria est Entis necessarii; tempus contingentis: 2. Aeternitas initii ac finis nescia est; tempus utrumque ad-

mittit : 3. Aeternitas tota simul est absque
successione ; tempus prioris ac posterioris in-
tervallis distinguitur .

Quaeritur , num in Aeternitate admitti pos-
sit successio . Quod ut definiatur , triplex Suc-
cessionis distinguenda est notio : *physica* nimi-
rum , *metaphysica* , ac *logica* . Prima quae va-
riis intervallis sese excipientibus distinguitur .
Altera , quae licet in spatia ac momenta non
dividatur , utcumque tamen dividi potest .
Tertia , quae licet reipsa nulla sit , Mentis
tamen conceptu excogitatur .

De logica quidem lis nulla institui potest ;
haec enim penes Mentem est , atque extrin-
secus se habet ad Aeternitatem . Physica vero
ac metaphysica plurimum abhorret ab Aeter-
nitate .

Et quod ad physicam attinet . 1. In infini-
to nullae sunt partes : atqui Aeternitas est in-
finita duratio . Ergo . 2. Ubi nulla mutatio ,
ibi nulla successio . Aeternitas autem Dei im-
mutabilis propria est . Ergo .

Quod autem ad metaphysicam spectat : Men-
sura refertur ad partes , quas metiri licet :
Nullae autem in Aeternitate partes . Nullo
igitur pacto Aeternitatem dimetiri licet .

§. VI.

De Finito & Infinito .

Finiti atque Infiniti voces *Grammatico* sen-
su acceptae , prima quod fines habet ,
altera quod fines excludit , significant . Hinc
pri-

prima positivam, altera negativam notionem praefert.

At si *Philosophicus* sensus inspicatur, infinitum valet *perfectissimum*; finitum quod a summa perfectione desciscit. Quae quidem infiniti notio fuit ex natura Entis necessarii, cui vox illa propria est, ac peculiaris.

Philosophico igitur sensu inspecto, notio Infiniti est positiva, Finiti vero negativa. Quod enim absolutissimum est, atque *essendi* plenitudinem complectitur, notione valet positiva: quod autem imperfectum est, & constitutos limites transilire nequit, illius notio negativa est. Atqui vocum Infiniti & Finiti haec est potestas Philosophica. Ergo.

Jam vero quaeritur, num Grammatico sensu accepta infinitas extensioni, ac numero conveniat, an vero repugnet. Heic autem distinctione opus est. Nam si infinitatem *relate* ad Mentem nostram inspiciamus, nulli certi limites nobis occurrent, quos ultra extensionem aut numerum progredi non posse concipere datur. Sin *absolute* infinitas accipiat, tum extensioni tum numero repugnat.

Nam 1. extensio est partium continuatio: Ubi autem sunt partes, ibi extremi earumdem fines. Ergo. 2 Numerus non est, nisi rerum multitudo, quarum singulae finitae sunt. Limitata igitur est multitudo.

C A P U T IV.

De Caussis.

CAussam vulgo definiunt *quod influit esse in aliud*. Multiplex distinguitur, *efficiens, materialis, formalis, finalis, atque exemplaris.*

Efficiens causa est, quae virtute sua effectum producit: ut artifex statuam.

Materialis, unde effectus educitur, veluti metallum, quo statua conflatur.

Formalis, quae formam rei tribuit; quae scilicet rem definit, ut talis sit.

Finalis, cujus amore & gratia causa efficiens aliquid producit: ut gloria, quam artifex in elaboranda statua intendit.

Exemplaris tandem causa dicitur id, quod sibi ad imitandum proponit causa efficiens: veluti imago Caesaris, quam intuetur artifex in statua perficienda.

Jam porro Causa efficiens 1. vel est *prima*, quae nulli subiecta sua virtute agit, cujusmodi est Deus: vel est *secunda*, quae a prima pendet, atque ab illa mutuatur virtutem, ut sunt res creatae.

2. *Principalis*, quae ita effectum producit, ut in ipsa sit ratio, cur ille existat: vel *instrumentalis*, quae principali inservit.

3. *Adaequata*, a qua sola effectus produci-
tur: vel *inadaequata*, quae cum aliis praestat effectum.

4. *Physica*, quae vera actione effectum producit: vel *moralis*, quae utcumque occasionem

nem affert, ut effectus producat. ut.

5. *Libera*, quae ita agit, ut veram ad oppositum potestatem habeat: vel *necessaria*, quae naturae, vel alterius causae antecedenti necessitate ad agendum ita determinatur, ut ab actu abstinere nequeat.

METAPHYSICAE PARS II.

PSYCHOLOGIA.

CAPUT I.

De Humanæ Mentis natura.

Nuperi Philosophiæ corruptores *simplicitatis* ideam novitatis accusant : ac veteres animi naturam nonnisi corpoream agnovisse dictitant , ut qui illum *aëris* , *venti* , *balitus* nominibus designarunt .

Verum impudentissime mentiuntur . Ut enim ex historicis monumentis liquet , naturas a materia sejunctas veteribus innotuisse compertum est .

Illud duntaxat animadvertendum est , veteres nimirum plerosque imperfectam & confusam humanæ Mentis notionem habuisse . Imaginationis enim fallaciis decepti aëris ignisque viribus animi energias compararunt .

At non defuerunt inter ipsos , qui humanæ Mentis simplicitatem profligarunt ; quos inter eminent Epicurus , Aristoxenus , ac Dicaearchus . Epicurus quidem animum ex laevibus atomis confectum docuit . Aristoxenus ipsius corporis intentionem quamdam velut in fidibus animum esse dixit . Dicaearchus tandem nihil omnino esse animum tradidit , ac
vim

vim illam, qua agimus vel sentimus, a corpore separabilem non esse duxit; quippe quae non est nisi corpus ita figuratum, ut temperatione naturae vigeat ac sentiat.

Ex horum fonte biberunt, qui nuper sinceram Philosophiam adulterarunt, ac praesertim Thomas Hobbesius, Helvetius, Merianus, sive Auctor *Systematis naturae*, ceterique auctores libellorum, quibus praesens saeculum inundatur. Eorum errores, cum objectionibus fiet satis, & recensebimus, & redarguemus.

Neque omittendus Joannes Lockius, qui humanam Mentem quamvis simplicem fateatur, materiam tamen a Deo ita temperari posse docet, ut cogitandi vi polleat.

Jam porro Mentis nomine intelligimus id quod in nobis cogitat, ac sui suarumque cogitationum conscium est. Corpus vero sive materiam dicimus substantiam extensam, divisibilem, solidam, mobilem, atque inertem. *Extensa* nimirum; quippe partium continuatione componitur: *divisibilis*, ut quae in partes dividi potest: *solida*, quod alteri resistat, ne eundem locum occupet: *mobilis*, quod apta est, ut plura loca per successionem perlustraret: *inertis* tandem, quia suapte natura in eodem statu semper perseverat.

PROPOSITIO I. *Quod in nobis cogitat, non est corpus ipsum.*

Demonstratur I. Si Corpus cogitaret, cogitatio vel ex aliqua illius parte, vel ex partibus universis oriretur. Atqui neque singulae, neque universae partes cogitare valent. Ergo. Prob.

Prob. Minor. Singulae partes a ceterarum communione sejunctae ineptae sunt ad ciendum sensum. Ergo potiori jure ad cogitandum. Antecedentis veritas constat. Si enim cerebrum inter, ac nervos, & organa sensoria communicatio abruptitur, nulla in nobis cieri potest sensatio.

Idque adeo verum est, ut ipsi Materialistae nobiscum in eo consentiant. Ipsi enim cogitationem repetunt ex corporis temperatione, h. e. ex partibus omnibus inter se aptis & sociatis. Ut igitur pars altera Minoris demonstretur, expendendum prius est, num composito ex vi compositionis proprietas accedere possit, qua partes carent singillatim sumtae.

Duplex genus proprietatis in compositum derivari potest. 1. Totius compositi ordo ac symmetria, qua carent partes singillatim acceptae. 2. productio effectus alicujus, qui ex partium viribus in unum conspirantibus proficiscitur.

Prima quidem proprietas ex compositione proficiscitur; quippe partes seorsum positae nihil symmetricum edunt. At hujusmodi proprietas non est nisi modus, quo compositum a nobis inspicitur; symmetria enim ad intelligentiam nostram refertur, quae partium ordinem & consensum intuetur. Altera vero proprietas oritur ex compositione, quippe quae partium vires dirigit, ac temperat: at novas vires illa non creat. Nimirum partes singillatim sumtae effectum illum parere non possent, at viribus per compositionem conjunctis ac tem-

temperatis illum producant.

His positis : Si corporis partes cogitant , aut ex simplici earum compositione , aut ex earundem virium conjunctione proficitur cogitatio . Atqui neutrum dici potest . Ergo .

Prob. prima pars . Nihil est sine ratione sufficiente : esset autem cogitatio sine ratione , si partes non cogitantes certo quodam ordine conjunctae cogitarent . Ergo . Sola enim partium conjunctio symmetriam duntaxat , nullum praeterea effectum parit .

Prob. pars altera . 1. Compositio novas vires non creat , sed vires , quibus praeditae sunt partes , cogit in unum . Atqui humani corporis partes cogitandi vi destituuntur . Ergo .

2. Vires partium humani corporis in unum coeunt , cum motu agitatae aliae alias pellunt , ac pelluntur . Si igitur cogitationem ex virium conjunctione efficere possent , mutuo motu eam producerent . Ergo cogitatio motus esset . Atqui motus situm , cursum , & positionem partium exhibet , praeterea nihil . Situs autem , cursus , & positio non est cogitatio . Ergo .

Demonstratur II. Sensationes per organa sensuum haustas comparare , ac de iis me judicare perferentisco . Atqui quod de singulis sensationibus judicat , a sensibus ipsis , h e a corporis partibus distinctum sit oportet . Ergo . Singuli quidem sensus res , quae in alios incurrunt , excipere nequeunt . Ergo neque de iis judicare possunt .

Objicies . Impressiones in sensuum organis excitae omnes ad cerebrum deveniuntur . Cere-

re-

rebrum igitur excipit sensationes omnes , ac de iisdem iudicat .

Resp. nego consequ. In sensatione quatuor distinguere licet , 1. rem exterius objectam , 2. hujus appulsam ad organa sensuum , ibique excitatum motum , 3. huiusce motus usque ad cerebrum diffusionem , 4. rei objectae sensationem , sive perceptionem . Esto , cerebrum sentiat ; rei igitur objectae perceptio in nobis esset , quoties motio sensibus impressa ad cerebrum usque diffunderetur . Atqui si alio intenti sumus , nulla cietur sensatio . Ergo est aliquid a cerebro distinctum , quod nisi attendat & adsit , nullus erit sensus , nulla perceptio ,

PROPOSITIO II. *Mens humana est substantia a corpore diversa .*

Demonstr. I. Proprietates secum pugnantes eadem substantia complecti nequit . Atqui corporis proprietates Mentis proprietatibus adversantur . Ergo .

1. Mens iudicat : iudicium autem pugnat cum soliditate , quae est corporis proprietas . Iudicium enim fit ex duarum idearum ibidem simul praesentium comparatione . Atqui in materia ideae essent duae illius partes utcunque modificatae , quae in unum coirent ; coeuntes autem , alteram altera penetraret ; secus enim nulla esset comparatio , sed duarum idearum praesentia . Ergo iudicium pugnat cum soliditate .

2. Mens ratiocinatur ; ratiocinatio autem tria complectitur iudicia . Atqui iudicium adversatur soliditati . Ergo etiam ratiocinium .

2. Mens

2. Mens suarum actionum conscia est : Conscientia autem adversatur extensioni . Materia enim partibus componitur : singulae autem partes suarum duntaxat actionum consciae essent , non vero omnes omnium . Atqui omnium actionum Mens est conscia . Ergo .

4. Mens in seipsam reflexa suos actus expendit . Atqui reflexio repugnat corpori : partes enim corporis in alias partes reflecti possunt : at totum corpus in totum seipsum reflecti nullo modo potest . Ergo .

5. Mens percipit . Atqui nihil cum corpore commune habet perceptio . Si enim haec corporis proprietas esset , ea cognosci non posset , nisi ad corpus attenderetur . Atqui perceptio cognoscitur , quamvis corpus non cognoscatur : imo quamvis nullum existere corpus concipiatur . Ergo .

6. Mens sentit , atque ita sentit , ut unum in me sentire experiar . Atqui sensus repugnat extensioni : Si enim corpus sentiret , totidem sentirent , quot illud partibus componitur , Ergo .

7. Mens cogitat : cogitat autem vi interiori ac sua , atque ex alio ad alium actum profilit . Atqui huiusmodi activitas pugnat cum inertia . Est autem materia iners , & in eodem statu semper perseverat . Ergo .

Demonstr. II. Cogitatio actus est simplex , atque idem *intimus* & *immanens* , qui sc. in ipsa re fit , quae cogitat . Atqui actus intimus simplex simplicem postulat substantiam . Simplex igitur est humana Mens .

Prob. Minor : Actus intimus in re exten-

sa

fa aut multiplex , aut partitus sit oportet . Nam aut singulae partes actum edunt ; totidem propterea erunt actus , quot partes . Aut singulae partem actus duntaxat efficiunt ; actus igitur per universas partes dispersus dividuus erit . Non igitur simplex . Ergo .

Objic. I. Humana Mens simplex propterea adferitur , quod cogitatio materiae repugnat . Atqui non adversatur . Ergo . Ea proprietates materiae adversatur , quae illius soliditatem atque extensionem destruit ; cogitatio autem corpori adjuncta nihil hujusmodi proprietatibus officit . Quemadmodum enim cogitatio excedit conditionem materiae , eandem superant vegetatio , ac sensus : Sensus autem ac vegetatio materiae proprietates non subvertunt in brutis ac plantis . Ergo .

Resp. negando comparisonem . Nihil enim ad rem faciunt , quae de sensu , ac vegetatione adducuntur . Vegetatio enim materiae propria est , ac peculiaris . Nam haec oritur ex certa quadam plantarum fabricatione , & succi perenni circuitione ; tota igitur absolvitur motu ac partium dilatatione . De sensu in brutis mox disputabitur .

Objic. II. Propterea cogitandi vim materiae a Deo tribui non posse statuitur , quod assequi non possumus , quo pacto materia cogitat . Atqui absurdus est , qui ea Deum praestare posse negat , quae postquam superant intelligentiam . Ergo .

Resp. Major propositio falso supposito laborat . Materiae enim repugnare cogitationem adferimus propterea , quod illius proprietates
cum

cum cogitatione valde pugnare evidenter percipimus. Ducti igitur eo axioma, quod idem subiectum complecti nequeat proprietates secum pugnant, id ne a Deo quidem fieri posse tuemur.

Objic. III. Substantia cogitans ab extensa distinguitur, quia nulla cogitationem inter atque extensionem analogia intercedit. Atqui nullam secum habent analogiam cogitatio, ac sensatio. Ergo distinguenda est substantia cogitans a sentiente. Atqui non distinguitur a sentiente cogitans substantia. Ergo neque extensa a cogitante.

Resp. 1. dist. min. Nulla sensationem inter & cogitationem veritur analogia, si utriusque facultatis objecta comparentur, concedo; si actus, nego. Nihil profecto commune habet iusti injustique notio, cum luce, odore &c. At injusti cogitatio Mentis est attentio ad injusti ideam, quam sibi praesentem sistit & coloris autem sensatio, ejusdem est Mentis attentio ad motum a luce in nervis opticis, cerebroque exitum.

Resp. 2. neg. consequ. Esto, nulla sit inter objecta proportio. Haud propterea diversae erunt substantiae, ad quarum facultates illa pertinent. Nulla quidem inter odorem ac sonum adest proportio. Atqui olfacere atque audire diversae sunt rationes ejusdem sentiendi facultatis.

Resp. 3. nego suppositum. Non ex defectu analogiae cogitationem inter atque extensionem colligitur substantiae cogitantis ab extensa distinctio: sed ex vi analogiae, h. e.

Ergo cogitans ab extensa distinguitur.

repugnantiae illa deducitur.

Objic. IV. Cognitionum omnium origo a sentiendi principio est repetenda . Atqui hoc principium est corporeum . Ergo . Cognitiones aliae aliis succedunt ; perennes igitur subit vicissitudines principium illud , in quo versantur . Simplex autem substantia mutari nequit . Ergo .

Resp. 1. neg. major. Univerſa enim cognitio ad res duntaxat, quae in ſenſus incurrunt, hic ab Hobbefio revocatur . Atqui plura cognoscimus , quae in ſenſus non cadunt . Ergo ſentiendi principium quale ſtatuit Hobbefius, non eſt illud , unde homo cogitat .

Resp. 2. neg. min. ſubſumptam . Simplex quidem ſubſtantia eas mutationes reſpuit, quae ex partium varia temperatione proficiſcuntur . At eas ſubit, quae ex variis cognitionibus ac ſenſationibus oriuntur . Sentiens proſecto & cogitans ſubſtantia verſatilis ſit oportet ;

Objic. V. Spiritualis ſubſtantiae nulla datur idea . Mens ergo ſpiritualis eſſe nequit . Spiritus definitur ſubſtantia indiviſibilis , inextenſa , inviſibilis , ſenſibus impervia . Atqui id eſt negatio rerum omnium , quas cognoscimus , h. e. idearum omnium abſentia . Ergo .

Resp. 1. diſt. antec. Si ideae nomine ſenſibilem imaginem accipias, concedo : ſi notionem puram, nego . Nullo pacto fieri poteſt, ut veluti depictum exprimam, quod colore , ceteriſque ſenſibilibus qualitatibus deſtituitur . At intelligentia aſſequi poſſum ens cogitans, quod partibus non conſtat . Plura enim re ipſe concipimus, quorum ſpeciem imaginatione aſſequi nequimus .

Resp.

Resp. 2. neg. major. Falsum est spiritum designari per negationem eorum, quae cognoscimus. Ens enim quod cogitat positivam ideam praefert. De Mente ea negamus, quae cum notis illius proprietatibus repugnare deprehendimus.

Objic. VI. Mens agit in corpus, illudque movet. Sed concipi nequit, quo pacto quod extensum non est in extensum agat. Ergo.

Resp. per instantiam, ut ajunt. Intelligi nequit, quo pacto corpus in aliud agat, illudque moveat. Ergo corpus in corpus non agit. Quid hic Meriannus? Nempe sensibus percipi ait, quod corpus in aliud agat. Atqui interiori sensu corpus a Mente moveri persentisco. Hujus actionis rationem non teneo: at de actione ipsa dubitare non licet.

Objic. VII. Iisdem affectionibus, quibus subjicitur corpus, & Mens afficitur. Eiusdem igitur sunt naturae.

Resp. dist. antec. Mentis corporisque affectiones sibi mutuo respondent, concedo; utraque substantia easdem omnino subit affectiones, nego. Conjunctio quidem Mentis cum corpore in eo versatur, ut certis Mentis cogitationibus certae respondeant corporis affectiones, & vicissim: ut suo loco docebitur. At isthaec consensio non postulat, ut in eadem natura Mens & corpus convenient. Si enim convenirent, hujusmodi reciprocae affectiones, sive modificationes mechanicis regulis subjicerentur. Atqui ex hisce regulis explicari nequeunt. Ergo. Pinge aliquem conviciis lacerari, statim perturbatae quidem in illius

illius corpore motiones excitantur. Contumeliae quidem vox cerebrum concussit eadem ratione, qua ceterae voces illud afficiunt, at illae huiusmodi motiones non efficiunt. Efficerent autem si corporis Mentisque affectiones mechanicis legibus subjicerentur; eadem enim causa eundem praestat effectum.

Objic. VIII. Bruta animantia utcumque cogitant. Atqui incertum est, corporeum ne, an spirituale sit principium, quod in illis cogitat. Ergo ex cogitatione Mentis simplicitas erui nequit.

Resp. neg. minor. Quae de brutorum anima obtinent Philosophorum opiniones, tres sunt. Aristotelici sensitivam animam, corpoream tamen, brutis tribuunt. Cartesiani puras esse machinas sensu vacuas bruta opinantur. Ceteri vero brutorum animas incorporeas esse tuentur. Atqui quodcumque statuatur, nihil Mentis humanae simplicitati officere potest. Nam 1. Aristotelici adserunt brutorum cognitionem materialem esse, eamque corporea duntaxat, concreta, & singularia attingere. Corpoream propterea ipsorum animam esse dicunt. At Mens humana incorporea, abstracta, atque universalis intelligit; spiritalis propterea est, ac simplex. 2. Cartesianorum opinio nihil humanae Menti adversatur; ipsorum enim sententia nihil bruta cum hominibus commune habent. 3. Qui tandem bruta incorporeis animis donant, humanae Mentis simplicitati maximopere velificantur. Incorpoream enim animam iis adtribuunt, quia ea sentire, & utcumque percipere deprehendunt. Quae

Quaeres quid de brutorum natura verisimilius statui possit?

Resp. Nihil hac de re definiri potest. Recensitae enim sententiae suis singulae laborant difficultatibus. Nonnulla igitur breviter adnotanda.

I. Bruta sentiunt, resque corporeas percipiunt. Id suadet experientia, atque analogia, quae inter nostras, eorumque versatur actiones.

II. Ea nequeunt esse automata, quae ex vi structurae moveantur. Nam 1. quod Deus huiusmodi automata efficere possit, non sequitur reapse effecisse. 2. Motiones spontaneae nullae sunt in automatis: at haec in brutis obtinent. 3. Motus in brutis a rerum externarum effluviis determinari nequit; tanti enim illa non sunt, ut tot tamque diversas motiones producant.

III. Peripateticorum sententia humanae Mentis simplicitati detrimentum adfert. Illud enim discriminis interest eorum sententia inter Mentis ac brutorum perceptionem, quod una spirituale, altera materiale obiectum attingat. Atqui perceptionis subiectum materiae expers esse oportet, ut humanae Mentis simplicitas adstruatur.

Quod autem appellant *materialem* brutorum cognitionem, eo sensu accipiendum est, quod ea *objective* eiusmodi sit, non autem *subjective*. Setus enim humanae Mentis perceptiones, quae circa res corporeas versantur, e corporeo subiecto proficisci possent.

IV. Quamobrem si brutis sensus, ac quaedam

dam cognitio inesse statuatur, ea incorporeo principio praedita erunt.

V. Haec tamen brutorum anima longo intervallo distat ab humanae Mentis conditione. Nam 1. bruta res duntaxat corporeas attingunt, atque iis tantum intendunt, quae ad vitae conservationem pertinent. 2. Praesentia tantum sentiunt, neque longinqua aut futura prospiciunt. 3. Singula in singulis, quas unice obeunt actiones, tota occupantur. 4. De rebus ipsis corporeis nullo pacto ratiocinantur.

VI. At enim brutorum animae finem ne habiturae sunt, an perennes vivunt? Si perennes, quid de ipsis fiet? Sin intereunt; incerta erit humanae Mentis immortalitas.

Utrumvis admittes, nihil sequetur incommodi. Nam 1. bruta libertate carent, legem propositam non habent, ad supernaturalem finem non ordinantur. Si gaudent igitur anima corpori superstite; ea neque caelo, neque inferis destinabitur. 2. Si ipsorum animae pereant; non erit propterea incerta Mentis immortalitas. Neque enim ex incorporea ipsius natura illa proficiscitur, sed ex Dei bonitate, sapientia, beatitudinis voto, ut mox dicetur.

C A P U T II.

De Humanae Mentis immortalitate.

TRiplex est immortalitatis notio. 1. Quod partium secretionem interire nequit, immortale dicitur; quo sensu idem est, ac *in-*
corruptibile.

2. Quod

2. Quod iis mutationibus, quibus suas facultates amittat, nunquam subijcitur, immortale etiam dici potest.

3. Quod nunquam in nihilum redigetur, immortale, & quidem proprio sensu, appellatur.

Tria autem haec non ita juncta sunt inter se, ut aliud ex alio proficiscatur. Nimirum quod Mens sit incorruptibilis, haud propterea immortalis erit altero aut tertio sensu. Singillatim igitur triplici hoc sensu humanae Mentis immortalitas vindicanda est.

PROPOS. I. *Humana Mens corruptioni non est obnoxia.*

Prob. Corruptio est partium secretio: Atqui nullas admixtas partes Mens habet ex ostensis. Ergo.

PROPOS. II. *Humana Mens a Corpore sejuncta vivit & cogitat.*

Prob. Mens a corpore sejuncta vivere & cogitare nequiret, si ipsius vita & cogitatio a corpore penderet. Atqui non pendet. Ergo.

Prob. Minor: Mentis vita est interior efficacitas & vis ex seipsa sese movendi. Atqui haec vitalis actio a corpore non pendet, quin imo facilius a Mente exferitur, cum a corpore dissociata fuerit. Ergo.

Nam 1. cum aliquid sublime contemplamur, animum in seipsum colligimus, & quoad ejus fieri potest a corporis sensibus abducimus.

2. Eo aliquid melius intelligimus, quo magis intentionem mentis a corporis sensibus avocavimus,

3. Nonnunquam in re aliqua ita toti occu-

pamur . ut a corporis consuetudine Mens aver-
sa externas res ad sensus offendentes non sen-
tiant .

Atqui haec omnia . evenire non possent , si
ex corporis consortio suam vitam , ac cogi-
tationem Mens hauriret . Ergo .

Objicitur I. Mens humana pendet a corpo-
re , ut cogitet . Ergo cogitandi vi destituetur
ab eo sejuncta . Prob. Antecedens . Plura in
corpore existunt , unde Mentis cogitatio va-
rie afficitur . Ex . gr. Puerorum organa imbe-
cilla atque imperfecta sunt ? imperfectae , imo
nullae sunt ipsorum cogitationes . Senum cor-
pus languore conficitur ? ipsorum etiam cogi-
tationes veluti torpescunt . Phrenesi , insania ,
ebrietate corpus laborat ? eadem Mentis cogi-
tationem perturbant . Ergo ;

Resp. dist. antec. Mens pendet a corpore ,
ut suas exercean functiones , concedo : ut ab
ipso cogitandi vim mutuetur , nego . Nimi-
rum corporis structura , temperatio , morbi ,
aliaque hujusmodi facultatum Mentis usum &
exercitium adjuvant , perturbant , atque inter-
dum interrumpunt . Quod quidem ex ipsa
Mentis Corporisque conjunctione proficiscitur .
Haec enim in eo sita est , ut certis corporis
motionibus determinatae respondeant Mentis
cogitationes ; & vicissim . Hinc est , quod si
vatio aliquo laborent motiones , cogitationes
ipsae sint imperfectae . Inde autem non sequi-
tur , quod ex Corpore , ejusque structura co-
gitandi vim Mens hauriat : sequitur duntaxat ,
quod illa , ut suis utatur facultatibus , corpori
subjiciatur . Id igitur argumento est , eo ex-
pe-

peditus corpore solutam Mentem cogitare, quo difficilius illius mole impedita in praefens cogitat.

Objic. II. Mens corpore soluta rebus objectis caret, in quibus cogitando versetur. Otiosa igitur non cogitabit.

Resp. neg. antec. Multa Mens habet, quae contempletur, ubi a corpore discedet. Nam 1. aliorum spirituum societas non pauca Menti suppeditabit, quae cogitatione prosequatur. 2. Seipsam intuens, ac intimum sensum excutiens, suos appetitus, ac volitiones secum Mens volutabit; & praeteritarum actionum memoriam repetet. 3. In suum Creatorem, quem intimo sensu docente agnoscit, oculos convertet. 4. Vel ipsam aspectabilem universitatem cogitatione complectetur, dummodo attentione circa illius corpora versetur.

PROPOS. III. *Humana Mens nunquam emoriatur.*

Demonstr. Unius Dei virtute aliquid in nihilum redigi potest. Atqui plura suadent, nunquam fore, ut humanam Mentem in nihilum vertere Deus velit. Ergo.

Prob. Minor. I. Non sine ratione sufficiente Deus agit. Si manet igitur ratio sufficiens, qua ipse Mentem condidit, eam interimere velle dicendum non est. Atqui manet haec ratio sufficiens. Ergo. Deus enim Mentem condidit, ut suas in ea perfectiones manifestaret: Atqui deleta Mente hujusmodi declaratio evanesceret. Ergo.

II Deus sapiens est: sapientiae autem ratio postulat, ut proposito fine agatur. Atqui si
Mens

Mens non esset perennis, nullo sibi proposito fine. Deus ageret. Ergo. Sui ipsius gloriam veluti proprium finem respicit Deus: Atqui nulla in Deum gloria redundaret, si Mens ad summae veritatis cognitionem & amorem apta & destinata corporis curae duntaxat addiceretur. Ergo.

III. Deus providentissimus est: providentiae vero ordo postulat, ut singulae res ad proprium finem dirigantur. Atqui hic ordo intercederet, si Mens non esset perennis. Ergo. In praesenti rerum ordine a Deo constituto finis, cui Mens destinatur, beatitudo est in Dei fruitione sita, & nunquam desitura. Atqui sublata immortalitate hujusmodi finem Mens non assequeretur. Ergo.

IV. Deus justus est: justitiae vero ordo postulat, ut recte factis praemium, male factis poena retribuatur. Atqui hujusmodi ordo examissim non impleteretur, si perennis non esset humana Mens. Ergo. In praesentis vitae statu nec virtuti merces, nec poena peccato exacte respondet. Altera igitur sequi debet vita, ut pro merito singulis poena vel praemium retribuatur. Atqui si altera est vita, perenne aetum Mens agit. Ergo.

V. Inscitus cuique hominum est ab ipso Deo beatitudinis appetitus. Atqui immortalitatis votum in eo appetitu includitur. Ab ipso igitur Deo nostrae immortalitatis admonemur. Beatus enim esse, nisi perpetua felicitate nemo potest. Nam immensi boni fruitio, unde beatitudo proficiscitur, si perpes non est, amittendi boni timorem incutit. Atqui timor

fe-

felicitati adversatur. Ergo.

VI. Ejusmodi est nostrae Mentis amor, ut cum re, quam appetit, consociari velit. Stabile autem ac permanens bonum Mens appetit. Conjunctio igitur, ad quam illa tendit, firma & perpetua sit oportet. Atqui immortalitatis spe sublata, hujusmodi conjunctionem assequi nunquam Mens poterit. Ergo.

VII. Naturae ipsius vocem exprimit hominum omnium consensus. Atqui universae hominum nationes Mentis immortalis opinione tenentur. Ergo. Hujusmodi consensus eruitur 1. ex Religionis observatione & Elysiorum ac Tartari fabula. 2. ex idolorum cultu. 3. ex sepulcrorum caeremoniis.

Objic. I. In praesenti vita virtuti praemium, & poena peccato retribuitur. Ipsa enim recte facti conscientia, atque inde exoriens pacata tranquillitas, uberrimus est virtutis fructus: contra scelerum conscientia satis superque improbos discruciat. Ergo ex ordine justitiae non eruitur Mentis immortalitas.

Resp. neg. anteced. Tum praemium. tum supplicium aeternum sit oportet, ut examusim virtutis, ac peccati meritis respondeat; quemadmodum mox dicetur. Ceterum ipsa justorum tranquillitas, atque improborum angor, Mentis immortalitatem arguunt. Nam recte facti conscientia solatur justos, quia virtutis fructum expectant. Improbi scelerum suorum stimulis torquentur, quia suppliciorum acerbitatem reformidant. Atqui id ex propriae immortalitatis opinione proficiscitur.

Dele

Dele enim ex hominum animis hanc sententiam, tūm spes mercedis, tum supplicii metus evanescit.

Objic. II. Virtus ac peccatum finiti agentis physicae sunt actiones. Justitiae igitur fit satis, si praemium ac supplicium ad statutum tempus rependatur.

Resp. dist. antec. Virtus ac peccatum *quantitate* finita sunt, concedo: at *qualitate*, nego. Et scire quod .i. ad virtutes attinet, illae ejusmodi sunt, ut nonnisi perennis beatitudinis praemio donari possint. Praemium enim, nisi aeternum, supplicium potius erit, ut antea diximus. His adde, quod si iusti ad statutum tempus praemio donati deinde prorsus interirent, afficerentur maxima poena, cujusmodi est annihilatio. Atqui sub Deo iusto nemo miser esse potest, nisi prius mereatur. Ergo.

2. Quod vero ad peccatum attinet: qualitas & ordo injuriae ab ordine & dignitate offensi defumenda est. Atqui Deus infinito intervallo excedit hominem; peccatum igitur infinitam in se malitiam comprehendit. Poena igitur, quae malum est physicum, licet aeterna, vix responderet peccato, quod est malum morale.

Objic. III. Immortalitatis votum non est a natura insitum, sed ab ipso homine effectum. Temere igitur ex eo Mentis arguitur immortalitas. Natura quidem nobis indidit, ut & ceteris animantibus, propriae existentiae conservationis appetitum: ex hoc autem appetitu in ea semper perseverandi desiderium exarsit.

Sui.

Sui igitur, ipſius amore ductus homo ſe im-
mortalem finxit.

Reſp. neg. anteced. Appetitus nobis a natu-
ra ingeneratus non eſt ad vitam ſervandam
duntaxat, ſed ad vitam beatam aſſequendam.
Nimirum natura duce eo contendimus, ut
non falli, non pati, non mori velimus. Tria
haec ex beatitudinis deſiderio veluti e ſuo fon-
te dimanant. Atqui nemo eſt, qui falli, qui
pati, qui mori velit. A natura igitur beati-
tudinis appetitus proficiſcitur. Beatitudo au-
tem perennitatem ſecum complectitur. Ergo.

Objic. IV. Totus homo immortalem ſe eſ-
ſe deſiderat. Atqui hoc deſiderium relate ad
corpus irritum eſt. Ergo etiam relate ad
Mentem.

Reſp. neg. conſequ. Solo quidem naturae
lumine deprehendere non licet, quæ fiat, ut
corporis vitae deſiderium non expleatur. At
id poenam eſſe depravatae naturae divinari li-
cet; ejus enim corruptionem, infelices expe-
rimur, licet origo nobis lateat.

C A P U T III.

De Mentis Effentia

Humanæ Mentis eſſentiam definire ardua
res eſt. Omnes enim ad unam illius
proprietas in numero habere quis poterit.
Phyſica igitur eſſentia incomperta erit. Hinc
autem & Metaphyſica eſſentia obſcura fit.
princeps enim proprietas definiri non poſſeſt,
ſi nonnullae latent. Verum id non eſt deſper-
ratae

rae sedulitatis: tentandum est, si quid saltem verisimile extundere licet.

PROPOS. I. *Humanae Mentis metaphysica essentia in sensu sui ipsius collocanda videtur.*

Demonstr. Plura sunt quae certa scientia, & clamante conscientia de humana Mente nobis constant. Atqui haec, quae comperta nobis sunt, metaphysicam illius essentiam in sensu sitam esse suadent. Ergo.

Certo quidem scimus Mentem nostram simplicem esse, atque immortalem. Conscii autem nobis sumus intelligendi volendique facultate eam exornari. Eadem praeterea conscientia nobis constat, eam tum seipsam, tum cetera, quaecunque in corporis sensus incurrunt, sentire. Quam propterea sentiendi facultatem in sensum *intimum* atque *extimum* distinguere licet.

Jam vero sensus intimi tria esse objecta persentiscimus. Nimirum 1. Mens seipsam existentem sentit, *numerice* quidem, *finite*, ac *dependenter*. Quaecunque agit ita persentiscit, ut nulla sit actio sensu destituta. 3. Quaecunque patitur in seipsa sentit: adeo quidem, ut sine sensu nulla sit passio.

Ex hoc autem sensu amor sui efflorescit. Sentit enim se conservationis, perfectionis, ac beatitudinis indigere. Id autem aptum sibi esse persentiscit: hoc igitur vehementer appetit: quo sane appetitu se vehementer diligit.

Hujusmodi autem sensus, sui que amor *perennis* est. Nam 1. Mens sibi semper adest; sem-

semper igitur seipsam sentit. 2. Mentis existentia perennis est; ergo & illius sensus. 3. Nullae Mentis actiones aut passionēs sensu carent: Agit autem semper Mens, aut patitur; Perenni igitur sensu afficitur.

Perennis itidem est sui ipsius amor, Nam 1. perpetuo sensu Mens admonetur, quo perveniat. Eo igitur perpetuo appetitu tendit. 2. Jucundas aut molestas affectiones Mens semper in se persentiscit. Eas igitur amore aut odio semper prosequitur. 3. Tum boni, quod deest, tum mali, quod adest, rationem in se Mens experitur; semper igitur appetit aut averfatur.

Haec autem omnia Metaphysicam Mentis essentiam aperiunt. Hoc enim nomine donatur proprietas, quae reliquas antecedit, quae ceteris substernitur, quae alias complectitur. Atqui huiusmodi sensus est. Ergo.

Nam 1. principem locum obtinet ea proprietas, qua ceterae deprehenduntur. Universas autem Mentis proprietates sensu adsequimur. Ergo.

2. Reliquis substernitur ea proprietas, quam reliquae consequuntur. Atqui prius, quam agat aut patiatur, seipsam Mens sentit. Ergo.

3. Ceteras complectitur ea proprietas, cui illae adhaerent. Atqui sive Mens intelligat, sive velit, intellectionem ac voluntatem sensus comitatur. Ergo.

Objicitur. Posita intelligentia Mens concipitur existens, etiamsi sensus auferatur; antiquior igitur intelligentia, quam sensus. Praeterea sive Mens sentiat, sive percipiat, si-

ve quemlibet actum sedat, intelligenti est; intelligentia igitur reliquas complectitur proprietates. Ergo haec erit metaphysica Mentis essentia.

Resp. neg. utrumque antecedens. Nam nulla est intelligentia sensu destituta. Hinc nisi Mens se intelligentem sentiret, se existentem non agnosceret. 2. Ad sensum revocantur ceterae Mentis actiones, & vel ipsa intelligentia. Quin imo universae Mentis facultates e sensu efflorescunt. Ideae enim, unde iudicia ac ratiocinia constantur, e sensu proficiuntur: tum universae Mentis appetitiones ex amore sui dimanant, qui e sensu accenditur, ut modo docuimus.

PROPOS. II. *Mens in perenni cogitatione versatur.*

In antecessum advertatur, cogitationis nomine haud hic intelligi singulares quoslibet intelligentiae actus, sed sensum sui, sui que amorem.

Demonstr. I. Mens sentiens est, vivens, atque activa. Atqui 1. ut sentiens sit, perpetuo sui sensu afficiatur oportet: 2. Vivens esse nequit, nisi perenni motu in se a se creatur. 3. Activa non est, nisi innato appetitu ad peculiaris bona feratur. Perenni igitur sensu, motu, atque appetitu praedita est. Ergo in perenni cogitatione versatur.

II. Quascunque corporis motiones Mens sentit. Atqui 1. perennes sunt motus corporis necessarii: 2. perpetuo tum hic tum ille corporis sensus ab objectis afficitur. Ergo nequam non sentit Mens.

Objic. In statu infantiae, ac somni Mens non cogitat. Ergo non versatur in perenni cogitatione. Si enim cogitaret, earum cogitationum reminisceremur: atqui non reminiscimur. Ergo.

Resp. dist. antec. Si cogitationis nomine accipias perceptiones, judicia, ratiocinationes &c. Mens per somnum ac infantiam non cogitat, concedo: sin sensum, nego. Et sane 1. Mentem, cum dorminus, sensu affici, licet languido plura suadent. Nam 1. molestus somnus est atque intermissus, cum corpus morbo aliquo laborat: contra suavis, cum valentes molliter cubantes dormimus. Atqui molestiae & suavitatis sensus ad Mentem attinet. Ergo. 2. Nonnunquam de iis somnium facimus, quae in corporis sensus incurrunt. Languide igitur hujusmodi objecta Mens sentit. 3. Momentum illud, quo somnum capimus, ab eo, quo expergiscimur, distinguimus. Intervallum igitur utriusque status Mens sentit.

Resp. 2. Mentem per somnum cogitare demonstrant insomnia, quibus nemo fere caret. Eorum autem non semper reminiscimur; at ne eorum quidem semper recordamur, quae vigilantes cogitamus.

Resp. 3 Infantes sive in utero matris conclusi, sive per primam infantiam, sitis, famis, doloris &c. sensationes habent. Cogitatione igitur non destituuntur.

PROPOS. III. *Essentia physica Mentis in proprietatum, quarum ipsa sibi conscia est, collectione statui potest.*

E

Prob.

Prob. Proprietatū omnium, quae rei cui-
libet insunt, collectionem dicimus essentiam
physicam. Atqui nulla est in Mente proprie-
tas, nulla facultas, cuius sibi ipsa conscia non
sit. Ergo. Prob. Minor: Si qua Menti inesset
facultas, cuius conscia non esset, illius equi-
dem sensu destitueretur. Atqui facultas illa
Mentis propria est; sui igitur sensu ipsa ca-
reret. Id autem interiori experientiae refra-
gatur. Ergo.

Heic autem nonnulla advertere praestat. 1.
Intimus Mentis sensus interdum languidus est
ac obrusus. Vividiores enim sensationes lan-
guidiores absorbent. Atqui, quae extrinsecus
sentimus ut plurimum vividiora sunt iis, quae
intrinsecus experimur.

2. Sensus sive conscientia attentione *directa*
nunquam destituitur, at a *reflexa* quandoque
sejungitur. Nimirum nisi Mens attendat, sen-
tire nequit: at sentit, quamvis intelligentiae
aciem ad id, quod sentit, non reflectat. Re-
flexio igitur Mentis, ut est intelligens, pro-
pria est, non vero quatenus est sentiens.

3. Quamvis sensu intimo quae sibi inhae-
rent Mens attingat, ea tamen ejusdem sensus
ope non distinguit. Illa quidem explicat at-
que evolvit, cum in se ipsam reflexa inti-
mum sensum excutit.

Objic. I. Si nihil Menti inesset, quod non
sentiret, illius essentia physica comperta esset.
Atqui exploratum non est, praeter ea, quae
sentimus, aliud non delitescere. Ergo. Prob.
Minor: Sensus sequitur experimentum: ni-
mirum eas facultates nobis inesse sentimus,
quas

quas in exercitium eductas experti sumus, ut in caecis ac surdis, qui lucis, ac soni nullas ideas habent, aperte patet. Atqui non constat, num omnes facultates in exercitium eductae sint. Ergo.

Resp. dist. maj. alterius syllogismi; Sensus actuum, & objectorum sequitur experimentum concedo; sensus facultatum, nego. Nimirum lucis, soni &c. ideam non habent, neque ejusmodi actuum sibi conscii sunt, qui aurium, aut oculorum usu destituuntur. Verum videnti audiendique facultatem sibi inesse sentiunt; interclusum enim hujusmodi sensuum aditum sibi patefieri exoptant. Facultatem enim, qua ad ceteros sensus attendunt, in se experiuntur: eadem igitur ad praepeditos sensus se attendere posse sentiunt.

Objic. II. Si universas Mentis proprietates sensu intimo adsequeremur, nihil facilius esset, quam illius naturae cognitio. Atqui hanc difficilem esse ostendunt variae Philosophorum veterum opiniones. Ergo.

Resp. Quamvis facile sit duce sensu se ipsum aperte cognoscere: non modicam tamen pariunt difficultatem superanda impedimenta, quae corporis sensus, imaginatio, & cupiditas obijciunt. Mens enim sensibus corporis devincta, & rerum corporearum imaginibus adsuecta, ne se ipsam quidem, nisi sensibilem se sibi fingat, nosse potest. Eadem praeterea cupiditate abrepta ita ad res corporeas fertur, ut eas a se nequeat secernere, quo se solam inspiciat.

C A P U T IV.

De Idearum Natura & Origine.

§. I.

De Idearum natura.

Cum in idearum naturam inquiritur, illud quaeritur, num idea a perceptione distinguantur. Id autem definiri potest, si quid ideae, quid perceptionis voci subjicitur intelligatur. Hinc in utramque partem quaestio solvi poterit, prout vario sensu ideam ac perceptionem accipias.

Nam I. Idea vocabulo intelligitur rei forma ac species Menti praesens: perceptionis autem nomine significatur Mentis attentio, qua hujusmodi imaginem sibi praesentem intuetur. Hoc quidem pacto idea a perceptione distinguitur perinde, atque actus ab ipsius termino separatur.

Verum si perceptio definiatur Mentis actio, qua rerum imagines sibi praesentes sistit: idem erit rei alicujus idea, atque ipsius perceptio. Neque enim aliquid Menti praesens esse potest, quod ipsa non percipiat; neque aliqua potest esse perceptio, quae alicujus ideae non sit perceptio.

Ceterum vel duo sint actus, vel unus idemque: binae tamen distinguendae sunt relationes, quae binis vocabulis designantur. Mentis attentio, sive repraesentatio, perceptionis vo-

cem

rem suo jure postulat : imago , ad quam attenditur , sive quae repraesentatur , ideae vocabulum sibi adsumit .

§. II.

De Idearum Origine .

PRaecipuae de idearum origine Philosophorum sententiae in duas classes secerni possunt : in prima collocare licet Platonicos , eosque imitatos Cartesianos : alteri ad censentur Peripatetici , & qui eos secuti sunt Scholastici , tum qui horum opinionem illustravit Joannes Lockius .

Platonici quidem rerum omnium infinitas & quasi consignatas in animo rerum notiones homines habere opinati sunt . Cartesiani item dispartiunt ideas in adventitias , factitias , atque innatas . Primas esse ajunt , quae occasione motuum , quos in sensibus externae res cient , a Deo producuntur ; secundas , quae ex acquisitis a Mente efformantur : tertias , quae a Deo nobis , ubi conditi sumus , consignantur .

Peripatetici contra humanam Mentem *raesae tabulae* , ut ajunt , similem esse censent , h. e. notionibus omnibus vacuum praeter eas , quas per sensus excipit . Hinc apud ipsos docetur , *nihil esse in intellectu , quod prius non fuerit sub sensu* .

Qui autem secuti sunt Scholastici idearum originem explicant per suas *species impressas* , sive rerum simulacra , quae in corporis sensus

lus incurrunt. Eas deinde per imaginationem defaecari, & ab intellectu agente fieri expressas, ac spiritualizari; ac tum demum intellectui patienti repraesentari docent.

Hanc vero opinionem novo apparatu proposuit Joannes Lockius. Is enim e duplici fonte ideas proficisci docet, a *sensatione* & *Mentis Reflexione*. Nimirum cum corporis sensus ab externis rebus percelluntur, earum Menti perceptiones adferri docet. Praeterea cum Mens in seipsam reflexa actiones suas expendit, perceptionis, judicii, &c. ideas eam sibi comparare tradit.

Singularis porro est Malebranchii opinio, qui rerum omnium ideas in Deo Mentem videre docuit.

Jam porro ut idearum origo definiatur, tria discutienda sunt: 1. num cudendarum idearum vim Mens habeat: 2. num sint ideae innatae: 3. unde nam ideas Mens hauriat.

PROPOS. I. *Mens insita vi rerum ideas producit.*

Prob. Universae ideae in adventitias, ac facultias distingui possunt. Atqui facultias Mentis opus esse fatentur omnes; adventitias autem itidem a Mente efformari fateri debent. Ergo.

Prob. Minoris pars altera. Qui adventitias ideas *passive* a Mente excipi tuentur, falso argumento ducuntur. Ergo. Et sane ita ipsi ratiocinantur. Ideaе sunt rerum formae: Atqui ignotae rei nulla efformari potest imago. Ut igitur rerum ideas Mens efformet, eisdem prius cognoscat oportet. Si autem res

co-

cognoscit, earum jam ideas habet. Ergo ante quam ideas effingeret, easdem haberet; quo nihil absurdius.

Verum hujus areumentationis minor sumpta falsa est. Neque enim universae Mentis cognitio ex ideis proficiscitur; & nonnisi per ideas objecta apprehenduntur. Nimirum sensus tum intimus, tum extimus rerum notitiam Menti praeber, quarum deinde ideas ipsa sibi efformat. Quod quidem mox perspicuum fiet.

Objicitur. Ideae realem habent *entitatem*, sive sunt *quid reale*; ergo idearum efformatio creandi facultatem postulat. Atqui creandi facultas Menti non convenit. Ergo.

Resp. dist. antec. Ideae sunt quid reale, h. e. positivum concedo; per se subsistunt, nego. Nimirum recte dicimus numeros ex. gr. figuras, qualitates sensibiles esse *quid reale*; quia haec omnia positive concipimus in rebus numero finitis; figuratis, sapidis &c. Verum haec ipsa nullam habent propriam existentiam sejunctam a rebus, quibus inhaerent. Ideae itidem quid positivum sunt, quippe Mentis actus sunt: at in ipsa Mente intimi atque immanentes; illius scilicet modificationes; quae propterea nullam habent propriam existentiam a Mente sejunctam. Jam vero creandi facultate opus non est; ut actam Mens producat; ut aliquam affectionem subeat: quemadmodum creandi facultatem non postulat certae configurationis in corpore productio.

PROPOS. II. *Ideae innatae, quo sensu a Cart*

reflexionis statuuntur, nullae dantur.

Prob. Ideas innatas non uno sensu accipiunt Cartesiani : Atqui quocunque sensu accipiantur, huiusmodi ideas dari repugnat. Ergo.

Et 1. innatam dicunt ideam, quae Menti ab ipsa sui origine praesens fuit. Atqui conscientiae refragatur, a primo ortus nostri momento praesentem ideam aliquam habuisse. Ergo.

2. Innatam appellant ideam Menti insitam, quae eidem sese ad intuendum offerat, ubi Mens attenderit. Atqui huiusmodi ideae in Mente delirescentes omnino repugnant. Ergo. Neque enim fieri potest, ut in se consignatas ideas Mens habeat, easque ignoret. Nam idea non est, nisi rei objectae imago, ad quam Mens attendit. Si igitur a prima sui origine consignatas ideas habuisset, ad easdem profecto attendisset. Atqui id conscientiae adversatur. Ergo.

3. Innatam vocant ideam, quam insita facultate nobis repraesentamus. Atqui hoc sensu non certae quaedam duntaxat, sed universae essent innatae. Ergo.

4. Innatam dicunt ideam, quam ceteris facilius universi homines habent. Atqui quamplures ideas facile & expeditae nobis comparamus. Ergo pleraeque ideae dicendae essent innatae.

PROPOS. III. *Universas ideas e sensu tum intimo tum extimo reflexionis opera Mens cudit.*

Ante quam demonstretur propositio, nonnulla advertere juvat. 1. Idearum cudendarum fa-

facultas Menti ex superius ostensis non est abjudicanda . 2. Ideae non sunt, nisi rerum objectarum formae, quas sibi Mens praesentes sistit . 3. Rerum imagines exprimere Mens nequit, nisi prius eas cognoscat . 4. Illud igitur, unde rerum notitiam Mens haurit, earundem idearum originem constituit . 5. Atqui rerum omnium sensibilibum per exteriores corporis sensus notitiam Mens adsequitur . 6. Illarum igitur idearum origo e sensu extimo repetatur oportet . 7. Multa autem sunt, quae in exteriores sensus non cadunt . 8. Eorum igitur cognitio exterius adquiri minime potest . 9. Horum ideas reflexionis opera sibi Mentem comparare ait Lockius . 10. Atqui reflexionem antevertit cognitio . 11. Aliquid igitur reflexione simplicius quaerendum est, unde huiusmodi cognitionem Mens adsequatur . 12. Nihil autem simplicius in Mente sensu sui, quo sua omnia persentiscit . 13. Ergo intimus sensus alter fons est, unde earum rerum fluunt ideae, quae huic sensui subjiuntur . 14. Quamobrem Mens attendens ad ea, quae tum interius, tum exterius sentit, reflexionis opera eorum ideas effingit.

His porro stabilitis demonstratur propositio. Ideae vel objecta corporea respiciunt, vel non item. Atqui illae ab exteriori, hae vero ab interiori sensu proficiscuntur . Ergo . Prob. pars prima. Idea effingi nequit, nisi prius res cognoscatur . Atqui res omnes corporeae per sensus exteriores a Mente cognoscuntur . Ergo . Prob. pars altera: Proprietates, actus, affectiones nostrae Mentis sensu intimo co-
gno-

gnoscentur. Ideae igitur, quae huiusmodi ob-
jecta respiciunt, e sensu intimo hauriuntur.

Heic autem quaeritur, num praeter hu-
iusmodi ideas, quae e sensu intimo profici-
scuntur, aliae sint, quae eandem originem
trahant. Lockius quidem eas ideas, quas Car-
tesiani innatas volunt, vel *immediate*; vel
mediate ab exteriori sensatione ratiocinando a
Mente comparari docet. Hinc 1. aeternitatis
atque infinitatis ideas, ita Mentem effingere
ait, ut altera ex certis temporis intervallis
simul additis, altera ex multiplicatione exten-
sionis proficiatur.

2. Virtutis, ac vitii ideas institutione at-
que exemplis adquiri docet.

3. Dei ideam ex propriae existentiae co-
gnitione ratiocinando unumquemque adsequi
trahit.

Verum via, quam aperit Lockius, ad hu-
iusmodi ideas comparandas minime ducit.
Nam 1. temporis intervalla certis circumscri-
pta limitibus, finitae longitudines, quantum-
vis multiplicentur, absolute infinitum non
efficiunt. Atqui aeternitatis atque infinitatis
ideae limites omnes transiliunt. Ergo.

2. Inhonesta atque injusta nonnisi ad hone-
statis normam comparata deprehendi pos-
sunt. Menti igitur praesto esse debet naturalis
regula, qua honesta, ac turpia comparantur.

3. Idem dicendum de immortalitatis, veri-
tatis, ac beatitudinis ideis: quas ab externa
sensatione vel per accuratas ratiocinationes
frustra quaeres.

Jam vero si interiorem sensum excutere

conamur, delitescantia ibi veluti semina deprehendimus, unde huiusmodi ideas comparamus. Et sane I. veritatis appetitum intime experimur. Nam 1. natura duce falsitatem odimus: adeo ut falli nolint etiam quicunque fallere amant. 2. Mendacia in aliis unanimi omnium consensione reprehenduntur. 3. Naturali cupiditate rerum rationes investigamus; veri igitur videndi appetitus nos tenet. 4. Veritatis adeptio oblectationem parit; veritatis igitur studio incendimur.

II. Honestatis sensum plura evincunt. Nam 1. scelorum turpitudine quisque offenditur, quamvis in eum laesura non sint. 2. Quaedam scelestae esse ac turpia nemo diffitetur, etiamsi nulla lata lege prohiberentur. 3. Ubi scelus aliquod admittitur, vehementes interius erumpunt conscientiae objurgationes. 4. Honestatis norma ratiocinationem antecedit; eam enim dirigit, atque emendat. 5. Eam effrenae ipsae cupiditates omnino obliterare non possunt; quippe propria scelera in aliis reprehenduntur; eaque, postquam cupiditatis aestus deferbuit, probata prius, vituperantur.

III. Innatum beatitudinis amorem experimur; quod quidem naturae votum ratiocinationem omnem antecedit; neque enim a nostra optione pendet, ut beati esse velimus.

IV. Huiusmodi autem appetitus immutabilitatis, infinitatis, atque aeternitatis sensum complectitur. Nam neque mori, neque falli volumus: bona quaecunque singularia appetitum nostrum explere non valent: bonorum perpetuitati confidere posse expetimus.

V. Ex

V. Ex his autem ipsius Dei notionem erueret licet. Naturali quidem amore beatitudinem appetimus, quae tum bonum immutabile atque infinitum, tum aeternitatem & veritatem complectatur. Atqui naturam expetire nequit, quod non sentitur; sentiri autem, nisi quod nos afficit, nequaquam potest; ab eo autem, quod non existit, affici non possumus. Quae igitur Mens expetit, alicujus Entis attributa reapse sint oportet. Ita igitur illius Entis ideam comparabimus, cui ea omnia, quae intime sentimus, accurate evoluta adscribimus.

C A P U T V.

De humanae Voluntatis Libertate.

Voluntas ea Mentis facultas est, qua bonum appetit, ac malum averfatur. De ea quaeritur, num libera sit. Eam quidem libertate spoliaverunt non modo inter veteres Stoici suo fato, ac Democritici atque Epicurei motu atomorum naturali, verum etiam recentiores humanitatis hostes, qui hominum dignitatem ad brutorum conditionem redigere conantur.

Jam porro libertas vel communi vel propria sententia accipi potest. Primo sensu est voluntas libera ab omni causa, quae extrinsecus cogat. Liberum igitur ac voluntarium sibi e regione respondent.

At libertas proprio sensu accepta est illa, quae omnem necessitatem tum internam, si-
ve

ve naturae, tum externam sive coactionis excludit: & quae *libertas electionis* vocatur.

Haec autem triplex est, *contradictionis*, *specificationis*, & *contrarietatis*. Libertas contradictionis est facultas agendi, vel non agendi: specificationis, agendi hoc vel illud, servato ordine finis: contrarietatis, agendi bonum vel malum, praetermisso ordine finis.

Lockius singularem libertatis notionem invenit. Ipse enim voluntatem definit esse facultatem, qua Mens tuas determinat cogitationes, ut aliquam eliciant sive impediunt actionem: libertatem vero facultatem, qua quis aliquem actum praestare, aut ab eodem abstinere potest, prout illius Mens alterutrum voluerit. Hinc voluntatem & libertatem duas esse diversas facultates docet, quae nullo nexu secum copulantur. At a communi omnium sententia ipse discedit: libertatem enim in hominis voluntate universi inspicunt; nam & olim quaesitum fuit, & hodie quaeritur, num homo cum vult ita velit, ut nolle possit. Num autem quod homo voluit exsequi possit, alia est quaestio, quae nihil ad libertatem attinet.

PROPOS. Humana Mens in suis volitionibus ac nolitionibus libera est.

Prob. I. Libertatem vivido sensu experimur. Nam 1: valde inter se differre sentimus volitionem, qua beati esse, & qua quodlibet aliud volumus. Hoc autem discrimen in eo versatur, quod a primo actu abstinere non possumus, ab altero possumus. Ergo.

2. Nunquam deliberamus, num felices potius,

tius, quam non item, esse velimus: delibera-
mus autem, sit ne aliquid nobis agendum.
Atqui deliberatio obtinet in iis, quae liberae
potestati subjiciuntur. Ergo.

3. Discrimen interesse sentimus inter dolo-
rem illum, quem admissum peccatum affert,
& qui e corporis morbo proficiscitur. Differt
autem primus dolor ab altero, quia illum
capimus ex idea mali, quod vitari a nobis
poterat. Ergo.

4. Qui venustum oris habitum praeseferunt
non perinde laudantur, ac qui praeclaras res
gerunt: neque eadem reprehensione digni sunt,
tum qui membrorum depravatione laborant,
tum qui vitiis urgentur. Atqui id ex eo pro-
ficiscitur, quod recte aut perversè uti posse
libertate sentimus. Ergo.

Prob. II. Singularia quaevis objecta, in quae
humana voluntas fertur, eam necessario deter-
minare non possunt. Ergo. Nam 1. humanae
voluntatis appetitus immensus est: Atqui
quaevis singularia objecta finita sunt. Illum
igitur explere non possunt. 2. Voluntas mo-
tivis agitur: Atqui bona quaecunque singula-
ria ejusmodi sunt, ut & boni defectus & ma-
li ratio in iis deprehendi possit. Ergo.

Prob. III. Universorum hominum consen-
sus naturae vocem exprimit. Atqui nulla est
natio, quae legibus careat, apud quam prae-
mia ac supplicia, laudes & vituperationes,
exhortationes ac minae non obtineant. Quae
omnia libertatis persuasionem aperte praefer-
unt. Ergo.

Objic. I. Sensus intimus aëivitatem danta-
xat

rat, non libertatem arguit. Ergo. Sentimus nostram determinationem, at ignoramus causam, quae nos determinat: eodem prorsus pacto nostram existentiam sentimus, cum non sentiamus actum causae, quae praestat ut existamus.

Resp. neg. antec. Non modo enim me ad volendum determinatum, sed etiam me ipsum determinare plane persentisco. Quemadmodum & me ad ideas attendentem, & me ideas ipsas mihi repraesentantem sentio. Me autem existere sentio: at ipse mihi conscius sum haud me esse, qui me ad existendum determino, aut aliquid ad meam existentiam confero.

Obijcitur II. Humana Mens aut percipit, aut iudicat, aut vult. Atqui in his omnibus nulla libertas. Ergo. Et 1. Ideae nobis occurrunt, velit, nolit Mens nostra. Ergo.

Resp. neg. antec. Rerum ideas ipsa sibi Mens efformat, easque sibi praesentes sistit: ut superius ostensum est.

Opp. 2. Omnis propositio aut vera, aut falsa necessario Menti proponitur. Nulla igitur libertas in judiciis.

Resp. dist. antec. Propositio aut vera, aut falsa ita Menti proponitur, ut ipsius naturam mutare non possimus, concedo: ut illius veritati, aut falsitati necessario assentiamur, nego. Profecto per nos minime licet, ut vera, aut falsa non sit propositio. Verum plena nobis adest libertas, ut evidentibus exceptis, assensum nostrum sustineamus. Necessary autem vera, aut falsa propositio nobis minime exhibetur. Praejudicia enim, cupiditates,

ob-

obtusa Mentis acies in caussa sunt , quare illius veritas , aut falsitas non deprehendatur .

Opp. III. Voluntas sequitur iudicium : atqui nulla in iudicio libertas . Ergo .

Resp. neg. min. Patet id ex dictis . Quia licet nulla esset in iudiciis libertas , eadem voluntatem destitui non colligeretur . Plerumque enim licet bona videmus , eaque bona esse iudicemus , deteriora tamen sequimur . Nam prout animo affecti sumus , ita res ipsas consideramus , ac libere in eas nos determinamus .

Urgent : Igitur perinde agimus , atque objecta ad nos referuntur . Ergo necessario se Mens determinat .

Resp. neg. conseq. Non negamus nos determinare , prout objecta nobis consentanea esse ultimo iudicio exhibemus . Verum modo non quaerimus , quibusnam rationibus homo ducatur cum agit : illud quaerimus , num liber homo sit cum agit ; nimirum num aliis rationibus inspectis possit non agere . Id autem ex propria conscientia aperte patet . Res enim objectae ejusmodi sunt , ut licet boni ratio in iis deprehendatur , boni tamen defectus , malique ratio inspicere possit . In iis igitur amplectendis , vel respuendis libere nos determinamus .

Obijcitur IV. Mens natura sua voluptatem , ac dolorem sentit . Dolor igitur , & voluptas sunt duae caussae , quae mentem necessario determinant .

Resp. dist. conseq. Si dolor , aut voluptas rationis lumen extinguunt , conc. secus nego .

Do.

Dolor enim ita considerari potest, ut boni ratio in eo inspiciatur; tum dolori vehementior dolor, aut voluptas opponi potest. Eodem pacto voluptati jucundior voluptas, aut dolor obijci, atque in ea doloris ratio deprehendi potest.

C A P U T VI.

De Mentis, & Corporis Conjunctione.

DUarum substantiarum conjunctio in eo sita est, ut certam quamdam secum habeant relationem, alternis nimirum agant & patiantur. Duo autem substantiarum genera cognita habemus, spiritus nimirum & corpora. Tres igitur conjunctionis species intelligi possunt. Aut enim illa inter duos spiritus, aut inter duo corpora, aut spiritum inter & corpus initur. Quamobrem Mentis cum corpore consociatio est ea utriusque substantiae consensio, qua certis quibusdam Mentis cogitationibus certae quaedam respondent corporis motiones: & contra certos corporis motus sequuntur certae Mentis cognitiones.

Hujusmodi porro consensio ex ratione quaedam proficiscitur, quod propterea conjunctionis *vinculum* licet appellare. Hoc quidem in conjunctione duorum corporum aut spirituum facile deprehenditur; mutus enim contactus praestat, ut duo corpora alternis agant & patiantur: ac reciprocos amor alterum spiritum alteri adjungit. Verum vinculum, quod

G

Men-

Mentem inter & corpus societatem colit, sub-
obscurum est.

§. I.

*De Vinculo conjunctionis Mentis cum
Corpore.*

TRES in hanc rem feruntur Philosophorum
sententiae Prima est Peripateticorum,
qui *physico influxu* Mentem in corpus, atque
hoc in illam agere docent. Idque probant
1. quia verum ac reale interest commercium
Mentem inter & corpus. 2. quia hac statuta
hypothesi facile explicantur quaecunque in ho-
mine obtinent phaenomena. Hinc colligunt
Mentem totam esse in toto corpore, ac to-
tam in qualibet ipsius parte.

Huic sententiae illud non leve potissimum
opponitur, quod Mentis simplicitati plurimum
officiat. Si enim illa reali ac physicae corpo-
ris actioni subjicitur, eidem resistat oportet.
Qui autem quod extensum non est extenso
resistit? Ejusdem igitur, ac corpus, naturae
sit oportet.

Altera auctorem habet Malebranchium. Is
quidem docet, quod Deus stabili lege, statim
ac Mens voluerit, determinatos motus in
corpore producit: contra vero ubi res exter-
nae in corporis sensus agunt, certas excitat
in Mente cogitationes. Hinc Mens motuum
corporis, & corpus Mentis cogitationum oc-
casionalis causa est: idcirco *causarum occa-
sionalium* hypothesis haec vulgo appellatur.

Plu.

Plura in hanc sententiam objici solent: æ præsertim 1. quod moralis esset atque imaginaria Mentis cum corpore conjunctio. 2. quod nulla suppeteret ratio, cur iisdem corporis motionibus aut nullae, aut oon eadem respondeant Mentis cogitationes. 3. quod nullam in suos actus Mens libertatem haberet.

Tertiam excogitarunt Leibnitius, & Wolphius. Ajunt ipsi 1. Mentem ejusmodi a Deo conditam esse, ut vi sua, licet corpori nunquam conjungeretur, perceptiones atque appetitiones omnes producat. 2. Corpus eo artificio elaboratum, ut omnes motus peragat, etiam si Menti non copularetur. 3. Hujusmodi Mentem & corpus ita Deum conjunxisse, ut series motuum corporis ad amissim perceptionibus atque appetitionibus Mentis responderet. Hinc propterea Mentis corporisque consensionem *harmoniam præstabilitam* appellant.

Non pauca sunt, quæ huic sententiae opponuntur. Et 1. quod nulla ratione adferitur series perceptionum in Mente & motuum in corpore. 2. quod hæc hypothesis ducit ad idealismum. 3. quod nulla esset Menti in sui corporis motus libertas.

Jam vero recensitæ hypotheses eo collimare videntur, non ut vinculum conjunctionis Mentis cum corpore, sed ut ipsius nexus causa investigetur. In quo tamen labor omnis ad irritum cadit; quæ enim ad Mentem attingunt, cum sensu intimo adsequamur, ea adæquate cognoscere non datur. Itaque his

omissis, quid nos conscientia doceat inspiciamus.

PROPOS. Vinculum, quo Mens cum corpore consociatur, cum potissimum sensus est, tum etiam appetitus, quia illa ad corpus tendit.

Demonstr. pars prima. Vinculum conjunctionis illud est, quod conjunctionem constituit, quo conjunctio deprehenditur, quo dissoluto conjunctio dirimitur. Atqui hujusmodi est Mentis sensus. Ergo.

Prob. Minor quod ad singulas partes. I. Conjunctio in eo versatur, ut Mentis cogitationes & corporis motus sibi mutuo respondeant; adeo quidem, ut ambae substantiae a se mutuo pendeant. Atqui sensus praestat, ut Mens a corpore, corpus autem a Mente pendeat. Sensu igitur fit, ut Mens corpori co-
puletur.

Prob. min. pars prima. Cum res externae in sensuum organum motum cient, ad hunc Mens attendens res ipsas percipit. Atqui cum ex motibus corporis exteriores res sensu Mens apprehendit, a corpore ipso pendet. Ergo.

Prob. pars altera. 1. Motus in corpore excitati apti sunt ad ciendam cogitationem propterea, quod corpus illud Menti adhaeret. In hoc igitur a Mente pendet.

2. Quaelibet sensatio externa ejusmodi est, ut principium & terminum complectatur. Atqui principium inter ac terminum mutua adest relatio. Nam & principium sine termino esse nequit, ac terminus a principio junctus nullus est. Quatenus igitur Mens sensiens

tiens est, corpus ab illa pendet.

II. Prob. pars altera Minoris prior. syllog. Sentiendi facultas duo complectitur, quod sentit, & quod sentitur: quod sentit in homine Mens est, quod sentitur, corpus. Atqui sentiri nequit, nisi quod loco & tempore praesens est. Mens igitur ut sentiens est, corpori alicui conjuncta intelligi debet. Ergo conjunctio Mentis cum corpore posito sensu deprehenditur.

III. Prob. pars tertia: Cum partium corporis temperatio ita perturbatur, ut sensui Mentis excitando illud ineptum sit, Mens a corpore sejungitur. Ergo dissoluto sensu Conjunctio dirimitur.

Demonstr. pars altera propos. Appetitiones a natura insitae. ita comparatae sunt, ut irritae esse nequeant. Atqui natura ipsa Menti appetitum ingehuit, ut corpori conjuncta vivat. Ergo. Hoc naturale desiderium probat 1. ardens cujusque studium, ut partes corporis omnes vigeant. 2. ingens cura, ne corporis vitia appareant. 3. metus mortis atque horror. 4. doloris quantumvis gravis optio, quam vitae ademptio.

Objic. Si corpori Mens sensu conjungeretur, eo extincto conjunctio disjunderetur. Atqui in extasi, deliquio, lethargo licet sensus expirat, Mentis tamen corporisque societas non dirimitur. Ergo.

Resp. neg. min. In iis, qui animo linquuntur sensus prorsus non extinguitur, sed veluti consopitus languescit. Cujus vel id argumeto est, quod vehementes rerum externarum

rum ictus, licet languide, sentiant.

§. II.

De Legibus Conjunctionis.

MEntis corporisque societas certis quibusdam legibus administratur. Hae autem praecipue sunt. 1. Tales sensationes Mens excipit, quales sunt motiones in sensuum organis excitae. Hinc remissis motionibus languidae sensationes, vehementibus vividae respondent.

2. Cujusmodi est Mentis adfectio, ejusmodi est corporis habitus, & vicissim. Hinc singulae Mentis passiones, ira, metus, amor, pudor &c. suas habent corporis motiones, quibus forinsecus manifestantur. Contra vero aegrotante corpore Mens suo quodam torpore corripitur.

3. Corporis incommoda Mentem, Mentisque labores corpus adficiunt. Hinc corporis temperationi Mens accommodatur, intelligendique facultate perinde utitur, atque expedita aut tarda est illius structura. At contra Mentis intentio severioribus studiis corporis vires defatigat.

§. III.

§. III.

De Sensationibus.

Quaelibet externa sensatio duo complectitur, Mentis attentionem, motumque in corpore excitum. Duo igitur quaeruntur, quid Menti, quidve corpori contingat, cum in nobis cietur sensatio.

Quod ad Mentem spectat, utrum ipsa, cum ad corporis motus attendit, agat, am patiatur, plane non liquet. Verisimilius videtur Mentis attentionem passionem potius complecti, quam actionem. Nam 1. sensatio non ab ipsa Mente elicitur, sed extrinsecus illi obtruditur. 2. Mens cum attendit prohibere nequit, quin ea excitetur cogitatio, quae motui corporis respondet. 3. Cogitatio, quam sensus ciet, valde discrepat ab illa, quam ipsa sua vi producit.

Quod vero ad corpus attinet, in antecessum advertenda sunt nonnulla, quae illius structuram respiciunt. Cranii cavum substantia quadam molli repletur, quae in globum anteriorem, & posteriorem dividitur: ille major *cerebrum*, hic minor *cerebellum* dicitur. Ex hisce duobus globis exoritur *medulla* quaedam *oblongata*, quae e cranio prodiens vertebrarum spinam ingressa *spinalis* appellatur.

Iude *nervi* suam arcessunt originem. Sunt autem nervi partes albicantes, teretes instar filorum, oblongae absque manifesto cavo. Novem ipsorum paria, sive *conjugationes*, ut

ajunt, e Medulla oblongata, duo & triginta e spinali profecta ad sensuum organa ceterasque corporis partes ducuntur.

Hujusmodi nervorum usus est, ut sint sensationum instrumentum: tremore ne, an liquido per eos fluente, disputant Physiologi. Qui oscillationem rectius repudiant, ajunt e sanguine, quo cerebrum abundat, defaecari ac scerni perquam tenuissimum humorem, qui per nervos devehitur, quique propterea *succi*, vel *fluidi nervei*, vel *spirituum animalium* nomen habet.

Jam vero cum res externae ad organum sensorium appellant, motum nervo imprimunt, qui succo communicatus ad cerebrum usque diffunditur. Itaque ut sensatio cieatur, duo fiant oportet: tum ut fluidum nerveum ob rerum externarum appulsu motum concipiat; tum ut hujusmodi motus ad cerebrum usque devehatur.

§. IV.

De Mentis in Corpore sede.

MEntis sedes in corpore, sive commune sensorium, pars illa appellatur, ad quam succi nervei motus omnes referuntur. Haec autem nonnisi in cerebro statuenda est. Nam 1. nervi omnes e cerebri substantia proficiuntur. 2. Discissa nervorum cum cerebro communione sensus ac motus omnis intercedit. 3. Cerebro laborante sensus ac motus aegrescunt.

At

At quae potissimum pars cerebri sit, ad quam unicam & singularem succi nervei motus deferantur, non liquet. Cartesius quidem pinealem glandulam, alii corpus callosum, alii corpora striata, alii tandem medullam statuunt.

At inquires: Nobis videmur in ea corporis parte sentire, quam externae res percellunt. Ergo Mens per totum corpus diffunditur.

Resp. neg. consequ. Cum enim ope bacilli corporis alicujus duritiem, fluiditatem &c. experimur, in illius extremitate hujusmodi qualitates sentire videmur. Quis autem diceret Mentem per bacillum diffundi?

C A P U T VII.

De Imaginatione & Memoria.

Imaginatio sive phantasia illa Mentis nostrae vis dicitur, qua absentium rerum imagines, quas olim praesentes habuit, iterum sibi repraesentat. Hec autem quaeritur, qui fiat, ut hujusmodi imagines nobis obversentur; cum res ipsae nec sensuum organa, nec cerebrum afficere possint.

Plerique rem sic explicant. Succum nerveum ajunt ab externarum rerum ictibus in cerebrum impulsam, certos meatus in illius substantia aperire, vel fibras ita flectere, ut flexus illius supersint vestigia. Hinc fieri ajunt, ut si eisdem poros subeat, aut per easdem inflexas fibras fluat, vestigia olim impressa renoventur; ac propterea rerum imagines de novo suscitentur.

In

In hac porro Imaginatione Memoriam fixam esse docent. Praeteritas enim rerum ideas revocamus, cum illarum vestigia in imaginatione deleta non fuerint. Idque vel inde arguunt, quod cerebro perturbato memoria obliteretur.

Verum hujusmodi conjecturae nihil habent explorati. Nam 1. explicari nequit, cujusmodi sint signatae rerum imagines in cerebro. 2. Notionum *abstractarum* vestigia nulla fingi possunt. 3. Intelligentiam superat, quod ita in cerebro vestigia ponantur, ut nulla confusione perturbentur, neque alias ab aliis delectantur. 4. Neque intelligi potest, quemadmodum impressa haec vestigia a Mente fuscitentur. 5. Memoria in hac hypothesi Mentis propria non esset; ipsa igitur nulla unquam eruditione informaretur: nec judicando ac ratiocinando aliquid colligere posset.

Igitur statuendum est, quod Mens propria vi, non e corporis societate, suarum cogitationum memoriam habeat.

METAPHYSICAE PARS III.

THEOLOGIA.

CAPUT I.

Confutatur Atheismus.

Vetus Philosophia quatuor nobis offert disciplinas supremo Numini adversas. Prima est eorum, qui duce Democrito atque Epicuro ab atomis aeternis concursu fortuito simul coagmentatis praesentem rerum universitatem nulla moderante natura effectam esse docuerunt. Eaque propterea *corpuscularis* sive *atomistica* dici potest.

Alteram commentus est Anaximander, qui materiam docuit unicam rem esse, quae ab aeterno exstiterit, cetera vero omnia ipsius esse temperationes sive affectiones. Hanc autem philosophandi disciplinam *hylopathicam* dixeris.

Tertia auctorem habuit Stratonem Lampsaenum, qui singulis materiae partibus vitalem vim attribuit, cujus ope se fingere, atque in quascunque formas vertere illae possunt; quamvis nec sensum nec rationem ullam habeant. Atque isthaec doctrina *hylozoitica* nuncupari potest.

Quarta tandem profitetur hanc universitatem plastica seu effectrice vi imbutam esse, quae licet ratione destituta, artificiose tamen
eam

eam ordinat & componit. Hanc autem *cosmo-
plasticam* appellare licet.

In eo itaque conveniunt recensitae discipli-
nae, quod materiam ab omni aeternitate ex-
stitisse, atque ex ea universa, sensum etiam at-
que intelligentiam, profecta esse statuatur.
Deum igitur prorsus eliminant. Quamobrem
ante quam Deum esse demonstratur, impia
haec systemata convellenda sunt.

PROPOSITIO 1. *Materia ab aeterno existisse
nequit.*

Demonstrat. Quod ab aeterno est, existiendi
necessitatem complectitur, perfectissimum
est, atque immutabile. Atqui huiusmodi pro-
prietates a materia prorsus abhorrant. Ergo.

Prob. maior. Ens aeternum propriae exi-
stentiae rationem ab alio repetere non potest;
eam igitur in se complectatur oportet; suae
igitur naturae necessitate existit. Quod autem
necessario existit, omnem *essendi* rationem
comprehendit; propterea enim necessario ex-
sistit, quod universam *entitatem* continet. Idem
praeterea nullam in se mutationem admittit;
successio enim in aeternitate locum non ha-
bet; successio autem non est, nisi series vicis-
situdinum, quibus ens subjicitur; ens igitur
aeternum est immutabile.

Prob. minor quod ad singulas partes. 1. Ens
necessarium ejusmodi est, ut concipi nequeat,
nisi reapse existens intelligatur. Atqui mate-
riam plane concipimus, quamvis existentiam
ab ea sejungamus. Ergo.

2. Materia, qualem ipsi Athei admittunt,
stupida est, sensu atque intelligentia destituta.

Ca-

Caret igitur huiusmodi *essendi* proprietatibus. Ergo imperfecta.

3. Materiam ab omni aeternitate in mille formas sese vertisse Athei comminiscuntur. Nihil igitur ea mutabilius.

- PROPOSITIO II. *Motus non est Materiae essentialis.*

Demonstr. 1. Universa corpora aequè motui ac quieti resistere observamus. Atqui haec resistendi vis ab inertia materiae proficiscitur, qua nimirum illa suum statum servat omni vi aëtuosa nudata. Ergo.

2. Si motus esset materiae essentialis, illius partes semper moverentur. Si semper autem moverentur, nunquam secum cohaerere possent. Nullum igitur corpus conflarent. Ex materiae igitur partibus perenni motu percitis praefens mundus oriri nunquam potuisset, quod contendunt Athei.

3. Ut corpus moveatur, non modo concipiat motum necesse est, verum oportet etiam, ut aliquo dirigatur. Atqui nulla huius directionis ratio in materia continetur. Ea igitur, quae quoquoque moveri apta esset, omnino quiesceret.

At enim inquit Epicurus: Motus atomis naturalis motus est gravitatis; suo igitur pondere deorsum feruntur. Adest igitur motus directio,

Verum 1. principium petit Epicurus. Id enim quaeritur, cur adsit in atomis huiusmodi motus directio, nimirum cur illae deorsum ferantur; id a gravitate proficisci docet Epicurus, Atqui gravitas non est, nisi nixus de-

descendendi: illae igitur propterea descendunt, quia descendunt.

2. Atomos in infinito spatio moveri statuitur ab Epicuro. Atqui nullus inferior ac superior locus ibi esse potest. Ergo.

3. Gravitas non est, nisi peculiaris quidam motus, quo corpora telluris ad tellurem, ceteraque corpora ad ceteros Planetas tendunt. Atqui motus materiae non est essentialis; neque igitur gravitas.

PROPOSITIO III. *Quamvis Materia ab aeterno praedita motu fuerit, ex ea tamen Mundus prodire non potuit.*

Demonstr. Ut atomi secum cohaerentes corpus aliquod constituent, mutua attractione agitentur oportet. Atqui posita in atomis attractione, praesens rerum universitas ab iis effici non potest. Ergo. Vel enim numero finitas atomos in finito spatio moveri, vel per interminatum inane infinitas atomos volitare dixeris. Atqui in utraque hypothese atomi ineptae sunt ad mundum hunc efficiendum. Ergo.

Prob. minor. Atomis numero terminatae in finito spatio mutua attractione ita aguntur, ut aiae aliis adhaerentes unicam massam eamque sphaeroidicam constituent. Nullus igitur Mundus varietate corporum ornatus prodiret.

Sin altera admittatur hypothesis, nunquam plane definiri poterit, quidnam atomi efficiant. At esto, effecerint corpora, quibus haec continetur universitas. Planetarum tamen praesens systema enasci nunquam potuit. Ergo.

Prob. Minor. Planetarum conversio circa com-

commune solis centrum ejusmodi est, ut motus sit compositus ex viribus attrahente atque impellente apte dispersitis. Ut igitur Planetarum motus existant, tum attractio, tum proportionata impulsione quantitas simul componantur oportet. Atqui impulsione motus undenam oriri potuerit, ne divinari quidem licet Atheis. Ergo.

PROPOSITIO IV. *Materiae repugnat Hylozoitarum vita: neque ex ea sensus atque intelligentia oriri potest.*

Prob. pars prima. Vita, quam materiae Hylozoitae adscribunt, interior vis est, quae se ipsa movet ac fingit. Atqui vis isthaec materiae repugnat. Ergo. Nam 1. Materia iners est: cum inertia autem componi nequit activitas, ac motus interior ac proprius. Ergo. 2. Motus a se in se actus est intimus atque immanens. Atqui partes materiae in alias, non autem in se ipsas agere possunt. Ergo.

Pars altera abunde patet ex iis, quae alibi dicta sunt de cogitationis, ac proprietatum materiae repugnantia.

PROPOSITIO V. *Deum esse tum ratio, tum universi fabricatio, tum natura ipsa aperitissime suadet.*

Prob. pars prima. I. Aliquid ab aeterno existisse oportet: quod ab aeterno est, necessario existit: quod necessario existit, essentiali plenitudinem complectitur, infinitum nimirum est ac perfectissimum. Atqui huiusmodi ens Deum appellamus. Ergo.

II. Aliquid in praesens existit: atqui nihil est sine ratione sufficiente; aliquid igitur ab aeter-

aeterno fuit, unde illud prodierit. Atqui quod, ceteris initium dedit, universas *essendi* rationes complectatur oportet. Ergo.

III. Aut ens necessarium atque aeternum, aut contingentium infinita series statuatur oportet. Alterum autem repugnat. Ergo.

Prob. minor. 1. Entia, unde series isthaec constituitur, singula sunt contingentia; nullam igitur in se continent propriae existentiae rationem. Ergo & ea destituitur ipsa series. At qui repugnat esse aliquid sine ratione sufficiente. Ergo.

2. Series contingentium repugnat, si finita admittatur. Ergo infinita magis magisque repugnat; quippe in infinitum crescit indigentia entium, unde illa coalescit.

3. Entia, quae seriem constituunt, ita sunt, ut illorum nonnulla praeterierint, aliaque deinceps futura sint. Prioris igitur ac posterioris intervallis series ipsa subjicitur. Id autem repugnat infinitati. Ergo.

Prob. pars altera. I. Praesens rerum universitas pluribus partibus inter se apte connexis componitur. Atqui plurimarum partium ordo ac proportio intelligentem causam postulat. Existit igitur sapientissimum Ens, cui originem suam acceptam refert hic Mundus.

Prob. minor. Licet aeternas atomos multifariam coagmentatas mundana corpora effecisse dixeris: ipsarum tamen ordinata complexio sine intelligenti causa effici nequaquam potuit; ordo enim ac symmetria infinitis de causis excidere potest; adsit igitur oportet intelligens causa, quae ordinem constituat, & constitutum tueatur.

II.

II. Quae ad propositum finem diriguntur, effectus sunt causae intelligentis. Atqui singulae hujus universi res ad certum finem destinantur. Ergo. Majoris veritas aperta est; finis enim a causa duntaxat intelligente intendi potest. Minorem satis probat ipsius universi contemplatio; quippe nihil in eo est, quod suum usum non habeat, & ad communem finem non dirigatur.

III. Mundana corpora diversis viribus agitata in perenni conflictu versantur; paullatim igitur viribus imminutis ipsorum complexio dissolveretur. Adsit igitur oportet supremae causae efficacia, unde consistat.

IV. Mundi hujus machina diversis modis disponi poterat. Sed quod hoc vel illo pacto esse potest, sine ratione sufficiente esse nequit. Ergo.

Prob. pars tertia. I. Gentium omnium consensus ipsius naturae vox est. Atqui barbarae ipsae nationes licet obscura & confusa notitia summi Numinis non caruerunt. Ergo.

II. Humanum genus esse aliquando coepit; historia enim populorum originem, regnorum exordia, artium & scientiarum inventionem aperte tradit. Quod autem esse coepit, efficientem causam postulat. Ergo.

Objic. I. Ex nihilo nihil fieri potest. Ergo materia ab aeterno existisse oportet.

Resp. dist. antec. nihil fieri potest, quod aut eminenter, aut formaliter in aliquo non contineatur, concedo: nihil fieri potest sine praesistente subjecto, nego. Et sane verum est, illud, quod antea non fuit, esse non posse.

H

se,

se, nisi adsit causa, quae illud efficere valeat. Haec autem causa vel ejusmodi efficaciam habet, quae effectui aequivalet, vel effectum ipsum reapse in se complectitur. Cum autem causa effectui aequivalet, licet nullum praeesistat subjectum, unde ille educatur, effectus non ex nihilo, sed ab efficiendi causa proficiscitur. Materia igitur, quae antea non erat, esse potuit; quippe quae ab infinita Dei virtute condita est. Illud itaque axioma materiae aeternitatem non tribuit.

Objic. II. Ex praesenti universo Deum esse colligeretur, si secluso Deo illud esse non posset. Atqui ostendi nequit, fieri non posse, ut ab atomis aeternis mundus prodierit. Ergo. Prob. minor: Atomorum complexiones infinitae sunt: ergo inter eas versatur illa complexio, quae praesentem mundum constituit. Potuit igitur ea proficisci: si potuit, non repugnat eam proficuisse. Ergo.

Resp. neg. consequ. Licet aeternas atomos demus, earum tamen copulationes mundum effecisse jure negamus. Infinitae enim atomorum copulationes non omnes ordinatae sunt: sed ea duntaxat, quae praesentis mundi systema constituit. Ergo numerus coagulationum inordinatarum excedit ordinatarum numerum perinde, atque infinitum superat unitatem. Sed cum infinitum pugnat cum unitate, fieri nequit, ut infinito unitas praevalere. Ergo.

At inquires: Non solum inordinatae copulationes sunt infinitae, verum etiam infinitae sunt ordinatae. Ergo infinitae cum infinitis
pu-

pugnant. Ex infinitis igitur inordinatis una inter infinitas ordinatas profilire potest.

Resp. neg. consequ. Quaelibet enim ex infinitis ordinatis pugnat cum infinitis inordinatis. Quodlibet enim ordinatum systema infinitas inordinatas copulationes contrarias habet. Veluti uni triangulo aequilatero infinita scalenorum multitudo opponitur, uni quadrato infinitus trapetiorum numerus, & sic deinceps. Ergo.

Objic. III. Gentium consensus Deum esse probaret, si hanc sententiam a natura homines hausissent. Atqui Dei opinio ex regum calliditate, & naturae virium ignoratione perfecta est. Ergo.

Resp. neg. minor. Nam quod ad primum attinet: quod reges Religione usi sint ad imperium stabiliendum; non recte inde efficitur, eam esse illorum figmentum. Neque enim aliorum animos sibi conciliat, qui novas in eas opiniones inducit; sed qui inveteratis illorum opinionibus se adcommodat. Praeterea si Dei opinio politicum esset figmentum, barbarae gentes ea caruissent. Atqui hoc falsum esse suadet historia. Ergo.

Quod vero ad alterum spectat: quo diligentius in rerum naturam homines inquirunt, eo firmiori sententia. Deum esse sibi persuadent. Ignorantiae igitur effectus esse nequit Dei existentis opinio.

C A P U T II.

Confutatur Pantheismus.

Pantheismus is est, quo docetur totam rerum universitatem Deum esse. Hoc quidem impium dogma a nonnullis inter veteres Philosophos traditum illustravit, novoque apparatu proposuit Benedictus Spinoza. Is enim probare conatus est 1. unicam duntaxat substantiam in universo obtinere, 2. eam ex immensa cogitatione atque extensione veluti duobus attributis consari, 3. hanc substantiam Deum esse, 4. quaslibet particulares substantias Dei ipsius esse modificationes.

PROPOSITIO. Spinozae systema ambiguae substantiae notioni innixum claudicat, pugnantia secum componit, & pluribus absurdis scatet.

Demonstr. pars prima. Spinoza substantiam definit id quod in se existit, quod per seipsum concipitur. Atqui nihil hac definitione magis ambiguum. Ergo. Prob. minor: In seipso existere, per se ipsum concipi dici potest, quod ita existit, ut suae existentiae rationem in se complectatur, quod ut existat, alio ente non indiget. Praeterea & illud in se ipso existere ac per seipsum concipi recte dicitur, quod seorsum ab aliis existit, quod alio non indiget, cui inhaerendo existat. Atqui si primo sensu vox substantiae accipiatur, substantia non nisi Deus erit: at si altero sensu sumatur, totidem sunt substantiae, quot in univers-

ver-

verso res ab aliis separatae existunt . Igitur explicata definitionis ambiguitate corrumpitur unius substantiae systema .

Demonstr. pars altera . Universalis Spinozae substantia cogitatione atque extensione conflatur . Atqui repugnat , ut eadem substantia proprietates secum pugnantes complectatur . Ergo .

Demonstr. pars tertia . Divinitatis proprietates in Spinozistico systemate omnino subvertuntur . Ergo .

Prob. antec. 1. Deus simplicissimus est : atqui Spinozae Deus partes admittit . Quas enim ipse *modificationes* appellat , hae partes sunt , unde universum veluti totum quoddam constituitur .

2. Deus immutabilis est : atqui cogitationis atque extensionis , unde Spinozistici Dei essentia constituitur , perennes sunt vicissitudines . Ergo .

3. Tandem Spinozae Deus ob varias , quas complectitur modificationes , beatus est ac miser , sapiens ac stultus , honestus ac flagitiosus , dives ac pauper . Nihil autem hoc absurdius . Ergo .

Objic. I. Una substantia aliam producere nequit . Ergo unica existit substantia . Prob. antec. Si posset , vel ejusdem , vel diversi attributi substantiam gigneret : non ejusdem ; esset enim una eademque : non diversi ; cum nemo det , quod non habet . Ergo .

Resp. dist. propos. ejusdem *numero* , concedo ; ejusdem *specie* , nego . Identitas enim vel *numero* , vel *specie* est , ut patet ex Ontologicis : atque ex Logica liquet duas pluresve sub-

stantias in ejusdem proprietatis genere vel specie posse secum convenire.

Objic. II. Deus est infinities : sed ens infinitum realitatem omnem absorbet . Cogitatio igitur atque extensio , unde universum hoc constat , in Deo continetur .

Resp. dist. min. realitatem omnem completitur Deus *eminenter* , concedo ; *formaliter* , nego . Nimirum Dei essentia rebus omnibus aequivalet , earumque entitatem ab omni vitio vacuam in se completitur .

C A P U T III.

Confutatur Polytheismus .

Morum depravatio , Poëtarum fabulae , populorum superstitio id sensim effecit , ut unius summi Numinis opinione adulterata plurium Deorum cultus apud Gentiles invaluerit . Hisce adjungendi sunt , qui duos Deos , alterum bonorum omnium , alterum malorum opificem coluerunt .

PROPOSITIO. *Deus unus est .*

Prob. I. Deus est ens necessarium : atqui unum omnino ens necessarium . Ergo . Prob. minor . Entium contingentium existentia multiplex est , quia ab efficiendi causa determinatos *essendi* gradus illa habent . Atqui ens necessarium existendi rationem in se completitur . Ergo existendi necessitas multiplex esse nequit .

II. Deus est perfectissimus : ens autem perfectissimum unum est . Ergo . Prob. minor .
Ens

Ens perfectissimum omnem *essendi* plenitudinem in se complectitur : sed universa entitas nonnisi in uno contineri potest. Ergo.

III. Si plures essent Dii, inter se differrent: alii nimirum haberent, quo alii destituerentur; nullus igitur eorum esset perfectissimus; neque igitur Deus esset.

IV. Divinae naturae finitum repugnat; si plures igitur Dii sunt, infiniti sint oportet. Atqui hoc est absurdum. Ergo.

V. Naturae vox unum Deum praedicat; quippe unum Deum invocant homines, atque unum supremum a ceteris minoribus Diis distinctum ipsi Ethnici coluerunt. Ergo.

VI. Duos Deos alterum natura bonum, alterum malum esse omnino repugnat. Nam, 1. uterque fortis, & uterque imbecillis esset; quo nihil absurdius: 2. Malum non est natura aut substantia, sed naturae depravatio. Repugnat igitur, ut sit Deus natura malus.

C A P U T IV.

De Divinis Atributis.

DEi proprietates aliae sunt *physicae*, aliae *morales*. Illae divinitatem sequuntur; hae Deo ut supremae causae conveniunt.

§. I.

De Dei Simplicitate.

Simplex quatuor modis intelligitur, ut in Ontologia diximus. Quovis pacto simplicitas consideretur, Deo convenit.

PROPOSITIO I. *Deus non est corporeus: Physicae nimirum ac Mathematicae compositionis expers est.*

Prob. I. Pars natura sua prior est eo, quod partibus componitur. Atqui nihil Deo antiquius. Ergo.

II. Quod composito partes adferunt perfectius est quam compositum ipsum; ipsius enim essentia sine earum partium conjunctione nulla esset. Atqui nihil Deo perfectius. Ergo.

PROPOS. II. *Deo repugnat compositio ex essentia & existentia.*

Prob. Ens componi ab essentia & existentia concipitur, cum illud a potentia ad actum transire intelligitur. Atqui Deus ut ens a se necessario existit. Ergo.

PROPOS. III. *Deo repugnat compositio ex genere & differentia.*

Prob. I. Ex genere & differentia componi nequit, quod nulli entis generi subjicitur. Atqui Deus universam essendi rationem exhaurit. Ergo.

II. Genus praefert ideam entis, quod licet indeterminatum est, contrahi tamen & circumscribi potest. Ergo genus est ens finitum. Atqui repugnat, ut sub finito ente vel-

uti

uti species Deus contineatur. Ergo.

III. Ens univoce praedicari nequit de Deo & creaturis. Ergo.

§. II.

De Dei Immutabilitate.

Immutabilem Deum dicimus, quia cum necessitate naturae exsistat, neque sui natura, neque exterioris causae viribus, essentiae suae mutationem subire potest.

PROPOS. *Deus est immutabilis.*

Prob. Quod mutationi subjicitur, vel est, vel fuit compositum: est quidem, si quid adquirat, quo antea carebat; fuit vero, si quid ipsi eripiat. Atqui Deus simplicissimus est. Ergo.

Objic. Mutatur qui opus aliquod, quod agere potest, faciendum aggreditur. Atqui Deus, qui mundum creare poterat, illum deinde condidit. Ergo.

Resp. neg. conf. Tria in mundi creatione sunt distinguenda: creandi voluntas, creandi actio, & opus ipsum creatum: priora ab omni aeternitate in Deo fuerunt: posterius, cum antea non erat, esse incepit. Mutatio igitur non in Deo, sed in rebus conditis verificatur.

§. III.

De Infinitate & Immensitate Dei.

DEi infinitas sita est in absolutissima perfectionum omnium complexione : nimirum nec ulla virtus a Deo abest , nec cuique virtuti accessio fieri potest : *extensive* atque *intensive* perfectus est . Immensitas vero est infinita Dei virtus , qua ipse substantia sua praesens est rebus omnibus .

PROPOS. I. *Deus habet infinitam essentiam .*

Prob. Deus naturae suae necessitate existit . Atqui omnem essendi plenitudinem complectitur quod necessario existit ; ideo enim exigit esse , quia habet omne esse . Ergo .

PROPOS. II. *Deus est perfectissimus .*

Prob. Deus ex ostensis infinitus est secundum essentiam . Ergo quidquid esse potest , quidquid rationem entis habere potest in se complectitur . Ergo .

PROPOS. III. *Deus ubique substantia praesens est .*

Prob. Deus ubique res perenni effectione producit , conservat , ac movet . Atqui ubi Deus agens , ibi Deus substantia praesens . Ergo .

§. IV.

De Dei Scientia .

IN Deo vitii omnis pura scientia reperitur . Ipse enim omnia in se cognoscit ; neque ratiocinationis aut praecisionis ope , sed simplicissimo intuitu universa comprehendit ; ac
tan-

tandem nullis finibus ipsius scientia continetur.

Divinae porro scientiae primum obiectum est Deus ipse; infinite enim intelligenti infinite intelligibile suo iure responderet.

Secundi autem ordinis obiecta sunt, 1. possibilia; Deus enim suam essentiam cognoscit; ea igitur omnia ipse novit, quibus *essendi* rationem impertiri potest.

2. Quaecunque facta existunt; opifici enim ea ignota esse nequeunt.

3. Impossibilia omnia, eaque ex obliquo a Deo cognoscuntur; rationes enim entitatis perfectas ipse habet; ea igitur, quibus illa adversatur, indirecte novit. Qua quidem ratione peccata etiam cognoscit, nimirum per ea, quibus opposita sunt.

4. Futura omnia non modo necessaria, verum etiam contingentia. Deus enim causarum omnium colligationem comprehendit; quae igitur a causis producuntur ipsi non latent.

Obijc. I. Quae Deus fore praescivit, ea necessario eventura sunt. Atqui quod necessario futurum est, contingens ac liberum esse nequit. Aut igitur nulla sunt contingentia libera, aut nulla futurorum contingentium praesensio.

Resp. dist. major. eventura sunt necessitate antecedenti, nego; consequenti, concedo. Quae enim Deus futura esse praescivit, eventura sunt propterea, quod ipse fore praescivit, ut ea a causa libere se determinante producerentur.

Obijc.

Objic. II. Futura contingentia aequae esse ac non esse possunt. Quae autem definitam veritatem non habent, certo praesciri nequeunt. Ergo nulla est contingentium praescientia.

Resp. dist. min. non habent determinatum veritatem, si praesens tempus inspicias, concedo; si tempus, quo futura sunt, nego. Deus autem ab aeterno universa, prout sunt, videt: ea igitur, quae variis temporis intervallis futura sunt, certo novit.

§. V.

De Creatione.

Creationis nomine intelligitur actio, quae fit, ut, id, quod antea non fuit, esse incipiat: eam propterea *productionem ex nihilo sui & subjecti* vulgo definiunt.

Creationis idea revelationi divinae debetur: at eam ratio illius lumine illustrata etiam extundit.

PROPOS. *Mundum ex nihilo Deus produxit.*

Demonstr. I. Materia ex ostensis ab aeterno esse nequit; est igitur condita; ergo ex nihilo.

II. Materia esse incepit. Quod autem esse incipit, ab aliquo ente existentiam accipiat oportet. Materia igitur, quae non erat, auctorem Deum habet.

III. Ens infinitum universam *essendi* plenitudinem complectitur. Quidquid igitur entis rationem habet vel habere potest, in eo comprehenditur. Prius igitur, quam aliquid huius universi esset, in Deo id continebatur. *Mundus igitur e nihilo a Deoeductus est.*

IV.

IV. Duo sunt in universo naturarum genera, spiritus nimirum & corpora. Atqui 1. Spiritus e nihiloeducti sunt oportet; nullum enim praeesistens esse potest subiectum, unde illi educantur. 2. Quo magis spiritus corporibus praestant, eo illorum quam horum difficilius videri debet productio. Atqui ex nihilo spirituseducti sunt; ergo & corpora.

Objic. I. E nihilo nihil fieri posse evidenter patet. Creatio igitur evidentiae adversatur.

Resp. dist. antec. Nihil sine causa efficiente esse nequit, concedo; sine causa materiali, nego. Nimirum efficientissimam causam, quae effectui aequivalet, cuiusmodi Deus est, admitimus, cum e nihilo mundum prodiisse dicimus.

Objic. II. Res, quae creatur, aut esse incipit, cum non erat, aut cum erat. Primum esse nequit; existeret enim prius, quam esset. Neque alterum admittere licet, existeret enim, cum jam esset. Ergo creationis idea pugnantia complectitur.

Resp. neg. propos. disjunct. Res enim quae creatur, cum non est, esse incipit; a statu nimirum potentiae transit ad actum. Hinc duo in creatione momenta sunt distinguenda, alterum *negativum*, *positivum* alterum rei, quae creatur.

§. VI.

De Providentia.

Futurorum praesensionem, & rerum administrationem, qua ad suos fines illae dirigitur.

riguntur, Providentiam appellamus. Hanc & Gentiles quidam Philosophi, & nuperi Deistae Deo abjudicarunt. Deistarum porro vocabulum iis potiori sensu hodie tribui solet, qui Revelationem penitus rejiciant. Duo igitur breviter ostendenda sunt, tum Deum providum esse, tum revelata Religione homines indigere.

PROPOS. I. *Deus providentia sua res a se creatas gubernat.*

Prob. I. Deus est summe bonus; malus igitur atque invidus esse nequit; natura igitur sua prodest aliis ac prospicit.

II. Deus est ubique immensitate sua: atque ubique agit; ubique igitur providet.

III. Rerum universitas ejusmodi est, ut singulae ad suum finem aptae sint atque ordinatae. Atqui id intelligentem causam postulat, quae ordinem constituerit, eumque moderetur. Ergo.

IV. Contrariae vires, quibus caelestia corpora agitantur, motus aequabilitatem sensim perturbarent. Ergo adsit oportet causa, quae vires ipsas temperet.

V. Naturae ipsius vox Deum providum praedicat; ubique enim preces, vota, postulationes, gratiarum actiones ad Deum obtinent.

Objic. I. Ubi vitiositas, imperfectio, atque inordinatio est, ibi nulla provida causa. Atqui non uno vitio mundi machina laborat. Ergo.

Resp. neg. min. Quae enim vitia Athei in universo deprehendere sibi videntur, ea ex partibus singillatim sumtis defumuntur. Atqui partes a toto avulsae non nisi imperfec-

tiae

tae sunt ; ad totum enim , quod constituunt , referuntur . Quae igitur imperfecta videntur , ratione totius universi perfecta sunt .

Objic. II. Summa in hominibus obtinet inaequalitas ; bonis enim pessima multa , & malis prospera obveniunt . Hominibus igitur Deus non providet .

Resp. neg. consequ. Licet nonnunquam peccato poena aut virtuti praemium non respondeat ; id tamen non arguit humanis rebus Deum non providere . Praesentem enim vitam altera sequetur , in qua justitiae legibus fiet satis .

Objic. III. Si Deus esset providus , nullis malis humanum genus affligeretur . Atqui ingens malorum copia illud opprimit . Ergo .

Resp. neg. major. Tria malorum genera distinguenda sunt ; *metaphysicum* , defectio nimirum a summa perfectione ; *physicum* , animi scilicet corporisque dolor ; *morale* , h. e. culpa ac peccatum . Haec inter se ita complicata sunt , ut cum metaphysicum ab homine disjungi nequeat , possibile sit tum morale tum physicum . Nimirum 1. homo summe perfectus esse nequit , quia e nihilo conditus . Quod homo igitur malo metaphysico obnoxius sit , id Dei bonitati non adversatur . 2. Homo quippe e nihilo conditus mutabilis est : liber idem praeterea est : ac libertate spoliari non poterat , ut qui legi subjiciendus erat . Igitur a jure desciscere potest , h. e. peccatum admittere . Ergo malum morale ex defectibili hominis natura proficiscitur ; ac propterea cum Dei providentia non pugnat . 3. Hinc sequi-

quitur malum physicum ab ipso homine proficisci; poena enim peccati comes est.

PROPOS. II. *Revelata Religione homines indigebant.*

Demonstr. I. Non pauca officia Deo, nobis ipsis, aliisque nos debere naturae lege admonemur. Atqui ea omnia solo naturae lumine nec plane cognosci, nec praestari possunt. Ergo. Probatur minor. Ratio tenebris circumfusa, nisi superno lumine illustretur, omnia juris naturalis officia assequi nequit. Atqui multa existunt, unde illa obnubilatur. Ergo. Incuria enim ac negligentia, perversa institutio, animi cum corporis sensibus conjunctio, cupiditatum ardor, aliaeque hujusmodi ita rationem obscurant, pervertunt, ac depravant, ut caelesti lumine ac medicina opus sit.

II. Nostri animi depravationem licet inviti experimur. Atqui illius originem naturae lumine non assequimur. Neque igitur medicina huic corruptelae paranda praesto nobis esse potest.

III. A Dei amicitia ob peccatum homines excidunt; Igitur ut Deo ipsi concilientur, aliquis sequester intercedat oportet. Id autem naturae lumini impervium est. Ergo.

IV. Religio potissimum postulat, ut debitus Deo praestetur cultus. Atqui solo naturae lumine hujusmodi cultus plane deprehendi nequit. Ergo.

F I N I S.



527190

[Handwritten signature]

10. 10. 10. 10.

529100



